


柳田文庫  
文庫11  
D 289  
20



文庫11  
D289  
20

元書卷九十九

邵陽曾廉撰

東夷列傳第七十四

元代起朔漠其地北極北海故北皆內地也東則有高麗日本之屬高麗雖自爲國而立征東行省則亦與內地無異焉矣獨日本恃其險遠數勞招徠不爲元屈或述其答元使之辭曰我夷也彼亦夷也何貢之有嗚呼亦可謂倔強矣世祖好勤遠略亦非獨黷兵也王磐諫征日本帝言此在吾國法言者不赦則元之立法以伐人國嚴進諫之刑蓋自其祖宗已如此又諸將之貪暴達魯花赤之倚勢弄權利於用兵收人之子女玉帛樂監臨人國以凌轢其君攘奪其民安南王元萬言達魯花赤辱臨臣境安能空回沈痛哉其言之也故伐人國而戍之元人臣之所甘心者也而倚國

法以導諛其君則亦何國之社不可屋哉然世祖之時非開國比矣方其龍興諸王則有哈撒兒別里古台朮赤察合台拖雷諸臣則有四傑兩先鋒之屬皆雄猛絕世師行不齎糧兵過無留行世祖則惟有親弟旭烈兀而王之於西域亦未幾物故矣郭侃爲時名將西域以爲神人而馳驅王府未登朝列土土哈父子方急北方不遑他顧東瀛淼淼去天咫尺乃以范文虎亡國之庸闖屬以征討之重權此視宋之舊君若行路者也奈何以千石之任施之斗糠弗肩者哉夫萬里而伐人之國雖唐太宗百戰之英威加以世勩道宗之驍銳謀臣如雲戰將如虎曾不能得之於高麗何則其國無釁也況文虎之徒口無人氣而伐日本無釁之國堅船駛還託名狂颶覆師平壺夫豈天哉然海外用兵始於日本瓜哇之役亦自此弗能繼也易曰未濟征凶利涉大川當未濟之時征則

凶然必求其濟則利涉大川也齊桓有長勺之敗而霸天下秦繆有殽之敗而霸西戎漢高有滎陽之敗而卒滅項氏成宗以下弗能自振而美之者以爲息兵安民矣亦其時無良將相也然後天助蕃夷枵然坐大皆苟安者之弊也觀於歷史所載東夷若扶桑女國侏儒長人三韓百濟新羅濊貊之類世易時移或求其地多涉子虛或已併入人國元時無有焉錄日本流求三數國而已北方高麗以皆爲之屬故別傳

日本後漢時倭奴也舊唐書以倭國與日本爲二國以爲日本倭之別種又曰倭國自惡其名改爲日本又曰日本舊小國併倭國而有之大率是一國也在高麗東西海中地形長曲約五六千里廣至三百餘里或二百里流求在其西南蝦夷在其北其左右小島五十餘皆自名國而臣附焉前事具宋史本傳元興至元二年

以高麗人趙彝等言日本可通擇可使者三年命兵部侍郎黑的佩虎符充國信使持國書與日本示通好黑的道高麗高麗王禎以帝命遣其臣宋君表等導往日本不至而還帝謂禎徒以辭爲解也三年復遣黑的至高麗諭禎必得日本要領爲期禎終以海道險遠辭黑的而遣其臣潘阜等持書以往留六月日本人若爲未聞也者五年黑的等乃徑往至對馬島日本拒不納執其塔二郎彌二郎二人以歸明年命高麗送還執者俾中書省牒其國亦不報帝始銳意用兵是時帝方以趙良弼爲經略使領高麗屯田良弼以屯田不便而請使日本將行乞定與其國王相見之儀廷議與其國上下之分未定無禮數可言七年詔諭高麗國王禎送國信使趙良弼通好日本期必達仍以虎兒赤王國昌洪茶邱將兵三千衛之海上比國信史還姑令金州等處屯駐八年良弼至

日本欲見國王而爲日本人所遏百計欲脅取其國書良弼不從事在良弼傳於是日本始遣彌四郎者入朝仍送良弼至對馬島明年良弼遣書狀官張鐸還言去歲九月與日本彌四郎等至太宰府西守護所守者云曩爲高麗所給屢言上國來伐豈期皇帝好生惡殺先遣行人下頒璽書然王京去此尙遠願先遣人送奉使還報今同其使二十六人至京師求見帝疑其國主之使云守護所者詐也召問姚樞許衡等皆曰誠如聖算彼懼加兵故遣人伺吾強弱耳宣示之寬仁且不聽其入見帝乃諭中書省遣還高麗王禎復再致書日本令必通好大朝日本皆不省也十年良弼至自口本良弼本欲見其國王說以和好爲元息兵然僅至太宰府而還於是帝怒其梗命十一年命鳳州經略使忻都總管洪茶邱以千料船拔都魯輕疾船汲水小船各三百載士卒一萬五千

元書 卷九十九 三  
征之掠其四境以徇十二年更遣禮部侍郎杜世忠等往復致書亦不報十四年日本遣人持金來易銅錢許之十七年日本殺杜世忠等帝乃召范文虎議出師詔募征日本士卒十八年立日本行省以阿剌罕爲右丞相張禧平章政事范文虎洪茶邱爲右丞李庭爲左丞帥師以行帝諭諸將以師克在和其夏阿剌罕有疾阿塔海代爲左丞相秋范文虎棄眾十五萬於平壺盡爲日本所殺得還者惟三人事在文虎傳二十年立征東行省阿塔海復爲右丞相程鵬飛平章政事闍里帖木兒爲右丞劉國傑爲左丞大募兵造舟御史中丞崔或吏部尙書劉宣淮西宣慰使昂吉兒皆言民勞乞寢兵帝弗聽而以其俗尙佛二十一年戶部尙書王積翁請使日本乃遣之使與補陀僧如智自慶元航海往將入境爲舟人所殺二十二年乃調江淮漕糧募習泛海水工期以明春發

會於高麗之合浦會安南逆命帝曰日本未嘗相侵今安南寇邊宜置日本專事安南二十九年日本來互市遭風惟一舟達慶元舟中甲仗悉具恐有異圖詔立都元帥府防之大德二年江浙平章政事也速荅兒乞用兵日本成宗曰今非其時朕徐思之三年加補陀僧一山號妙慈宏濟大師使日本日本人竟不至十年日本商有慶抵沿海貿易以金鎧甲爲獻至正中遂屢寇沿海郡縣二十三年蓬州守將擊敗之日本訖爲海寇而元已亡

瑠求亦曰流虬曰流求曰琉球在福建東海中東北水道達日本國宋時未嘗朝貢至元二十八年海船副萬戶楊祥請以六千軍往降之不聽命則遂伐之朝廷從其請命祥爲都元帥將兵抵其國有書生吳志斗者上言生長福建熟知海道利病若欲收附瑠求且就澎湖發船往諭相水勢地利然後興兵未晚也世祖乃命

楊祥充宣撫使假志斗禮部員外郎奉詔以行明年自汀路尾澳舟行至海洋中東望有山長而低者約去五十里祥曰瑠求也因獨乘小舟至所望山下見其人眾先令軍官劉閏等二百餘人以小舟載軍器領三嶼人陳輝登岸眾不解三嶼人語爲其殺死者三人遂還逾月至澎湖祥責志斗已至瑠求文字志斗不從明日不見志斗蹤跡覓之無有也初志斗嘗斥言祥生事要功欲取富貴其言誕妄難信至是疑祥害之祥願稱志斗初言瑠求不可往今祥已至瑠求而還志斗懼罪逃去志斗妻子訴於官詔令祥還福建置對竟遇赦免問大德元年福建平章政事高興言今立省泉州距瑠求爲近可伺其消息招伐之不必調他省兵其歲高興遣都鎮撫張浩新軍萬戶張進赴其國禽生口百三十人亦未能臣服之也其國王初姓歡斯氏名渴刺兜延祐時國分爲三日中

山山南山北皆稱王至正後皆以尙爲姓云地產鬪鏤樹金荆榴家織蕉布女勤於男焉三嶼近瑠求小島也至元三十年命選人招誘之平章政事伯顏等言臣等與識者議此國之民不及二百戶時有至泉州爲商者去年入瑠求軍船過其國國人餉以糧食館我將校無他志也乞不遣使帝從之

骨鬼在黑龍江入海處東大海中南水道接古蝦夷北水道接古流鬼西與吉里迷鄰至元元年吉里迷內附言其東有骨鬼及亦里于歲來侵疆世祖命征之不果行三年骨鬼襲殺吉里迷部兵十年征東招討使塔匣刺請征骨鬼不允二十年詔募人征骨鬼從軍者免其賦旋以征東招討司聶古帶言前有旨進討骨鬼而如阿里海牙朵刺帶玉典三軍皆後期七月後海風方高糧仗船重深虞不測姑宜少緩從之其歲以征骨鬼兵視宋手記軍死則

以兄弟若子孫代之而不文其手二十二年詔陽兀魯帶爲征東宣慰都元帥佩三珠虎符帥萬人征骨嵬其後事史失之

斡卽亦曰兀者曰吾者漢沃沮也元時在合懶路水達達地內南入高麗北過黑龍江其地皆太古時林木翳蔽輒數百里人以捕獸爲食國初朮赤太子往收林木中百姓斡卽之在嶺北者也至治時征東末吉兀者以貂獺海狗皮來獻詔存卹三歲至正初斡卽數爲亂十三年伯撒里爲遼陽左丞相遂以皮貨來降十五年立斡卽野人吉里迷等處萬戶府於哈兒分

論曰以元之雄兵而未能服日本也地利不明而將帥冗怯也遂爲海寇元啟之矣何則天威褻而小醜生心也瑠求骨嵬益纖細矣顯比失前禽可也欲越海而有之其何以免觸藩之艱哉

元書卷九十九

陳兆龍 刊

門人曾傳魯襄校

門人曾士琮詳校

元書卷一百

邵陽曾廉譔

南蕃列傳第七十五

昔孔子刪書斷自唐虞帝典分命羲仲宅南交南交之內屬最古  
 已禹貢華陽黑水惟梁州黑水之委訖於南交之西所謂入於南  
 海者也蓋唐虞有夏聖人之聲教博遠越若有殷則叛亂發乎鬼  
 方氏羌而九有非復夏后氏之舊矣故成周之初周公相成王天  
 下號為太平時則越裳重譯來王白雉列於遠琛指南以示歸路  
 一若凌虛飄渺曠然六合之外豈後儒之記載欲侈張聖人之神  
 化大之而反小歟何其怪也春秋以來吳起為楚名將始開百粵  
 秦始皇并天下置桂林南海象郡於是堯封禹迹版圖復入於有  
 司漢承秦孝武帝既平南越遂置九真日南交趾諸郡自是而後



雖叛服不常然逆則討之順則舍之自古帝王所以經營天下威德兼重罔不是孚自非宋祖之柔謹斷未有舉中國數千年之土地人民一朝棄之使遂爲蕃夷者也故夫指南海之地以爲荒遠者是未覩聖人之六藝者也若夫島夷之屬夏后氏則以其卉服之貢列於揚州大抵百越之地其近黑水者爲梁州漢九真日南交趾是也其在淮海間者爲揚州漢南海鬱林蒼梧合浦是也卉服產自島夷而貢道多入自南海故列諸揚州云然當時所稱若都元邑盧沒譙離夫甘都盧黃支皆莫能實履其地而區別之亦但日日南徼外而已其後桓帝時大秦天竺遣使自日南徼外入貢西海復道通焉吳大帝始遣宣化從事朱應中郎康泰使諸國其所經及傳聞則有百數十國因立傳記而其書不可概覩也故詳南蕃者宋書海南諸國傳其權輿也自後至於唐而市舶使立

矣於是島嶼諸族知唐人之習以其枯木怪石名之曰珍寶實則彼視之不啻腐鼠矢溺者也惟唐人珍寶之則亦從而曰珍寶云爾而後唐人貪收難得之貨彼亦樂得不穀而食不蠶而衣也爾乃貢琛奉賚麇至鳥集靡不以貪互市之利而已自是海道益闢遂西至於波斯又西至於大食又西而至於拂菻矣蓋古者一山一水之阻輒老死不相往來何則舟車未興也久之而命僕戒塗以行江河羊腸殺功之阪旣而滄海崑崙身熱頭痛白骨彌漫鬼魅呼嘯之域皆坦途也豈非以利而趨之哉然而因人之利所以爲大利者天地是也未有在天地之中而不開闢者也故淮無夷徐無戎洞庭彭蠡間無三苗太行兩河間無赤白狄此造化之鼓萬物而不與聖人同憂而終於無所憂也詩曰惟其有之是以似之人有之斯似之矣天地有之斯竟之矣人之力不能遏天地之

機天地則協乎人以一其尊親也是故海上之國萌芽於漢鼎盛於唐至於宋則於其國中且不欲有之矣元興六十餘載世祖既平宋始詔泉州行省曰諸島蕃國皆知慕義可因蕃舶以朕意布告之誠能來朝將不惜寵禮其往來互市各從所欲至元十六年請下詔招海外諸蕃世祖亦不允也其後占城瓜哇用師天若啟世祖使之驅橫目之民以與獸牙鷹爪爭龍蛇之窟蓋天覆之地載之帝王子而教育之未之有異也若猶不能也則亦有待也故自天地視之滄海崑崙亦一山一水也且若周所謂華夏其土地幾何秦楚吳越稽諸前典豈非夷狄昔何以茫昧今何以聲明溯厥所元如彼揆其所卒如此然則聖人之所以承天地其必有在矣惟余攷諸蕃自前漢以來列史名輒數易苦不能盡悉本末然海中數大洲犁然具存是不可蝕也而中國梁揚羽翼資之矣然

後知聖人之籍之詳乎南海者非可爲淺見寡聞者道也於是摭拾至元以來諸將戰蹟與夫信使往還之國略敘其沿革其次第則依州分焉

安南古南交也周曰交趾一曰交阯或曰其趾交非也自漢至唐皆內屬曰交州唐改爲安南都護府始有安南之名宋初丁部領據而有之傳其子連藝祖就封部領交趾郡王而授連靜海節度使安南都護其後黎氏李氏皆擅自立宋授官爵均如丁氏其章奏文移皆曰安南道從藩鎮禮焉純熙元年封李天祚爲安南國王明年賜安南國印由是始爲安南國嘉定十七年陳日煚復代李氏爲安南國王本末悉具宋史外國傳元憲宗世日煚襲位且三四十餘年矣國在大理邊外都富良江南郡故交州也富良江亦曰洮江漢勞水也其東至海三百餘里南至占城西至暹皆千餘

里禍漢三郡地殺矣然自黎桓名其士卒曰天子軍不肯拜受詔李日尊遂號大越國稱皇帝值宋人戒生事久之傳位至日昫宋北防尤急日昫益肆至是凡三改元曰建中曰天應政平曰元豐宮室五門曰大興門正殿九間曰天安殿正南門曰朝天門其官屬大僚班士復有親王儼然天子矣當是時大元帥兀良合台已平大理遂鄰安南乃遣使諭日昫降日昫久帝其國素驕聞使言以爲大辱卽縛其使破竹以束其體入膚而下之獄於是兀良合台入自富良江大破其都屠其城日昫竄海島事具兀良合台傳旣而兀良合台引還復招日昫歸國日昫已老遂傳位於其子光曷光曷本名威晃旣襲位改元紹隆亦倔强惟知國兵雄乃遣其婿以方物來見且乞納款然在其國與入宋章奏則曰威晃入元則日光曷或以爲立詭名以欺元也世祖中統元年欲續前功乃

以孟甲爲禮部郎中充南諭使李文俊爲禮部員外郎爲副持詔諭之明年甲等還光曷遣其族人通侍大夫陳公奉員外郎諸衛寄班阮琛等詣闕獻書請定三年一貢帝從其請乃封光曷爲安南國王明年復賜以西錦三金熟錦六詔選儒士醫卜陰陽人匠等各三人及蘇合油光香金銀朱沙沈檀犀角象牙玳瑁珍珠綿白瓷盞等物同至仍以訥刺丁佩虎符往來安南充達魯花赤其時日昫亦受宋詔命日昫爲安南國大王威晃爲安南國王至元二年世祖賜之秣苙頒改元詔書於安南明年光曷遣使上表乞免所索秀才工匠人等四年答詔許之仍賜光曷以玉帶金縉藥餌鞍轡未幾復下詔諭以六事一王親朝二子弟入質三編民數四出軍役五輸納稅賦六定達魯花赤統治之又詔光曷發遣其國回商以來其歲詔封皇子忽赤哥爲雲南王以鎮大理鄰闡安

南初孟甲出使時詔書許其國官僚士庶典禮風俗一依本國舊制竝云已戒邊將不得擅興甲兵亂爾疆場光昺本習雪國威然微之兀良合台知北人不耐瘴癘雖用兵難久駐又恃險遠能用其眾於是立受詔如黎桓而宴使者已輒坐其上尤無藩臣禮甲庸人亦聽其所爲不與爭也自是益桀驁又得援詔書爲辭六年遂上書言回商二人均已病死帝復遣張庭珍爲安南達魯花赤兼爲使諭之亦不遜爲庭珍所責七年乃遣使入貢優詔答之而飭中書省牒責光昺言其受詔不拜待使介不以春秋王人之禮又以不發遣回商爲託辭欺誑八年光昺復書言本國已封王爵豈非王人天朝奉使復稱王人與之均禮恐辱朝廷況前詔命依本俗凡受詔奉安正殿而退避別室此本國舊典禮也又諭索儒醫工匠陪臣黎仲陀陞見之日咫尺威光不聞詔諭況中統四年

已蒙宥免何復及之十年中書復牒光昺言王云旣受王爵卽爲王人春秋叙王人於諸侯之上釋例云王人蓋下士也下士內臣之微者也後世列王爲爵諸侯之尤貴者也豈有以王爵爲人者乎前詔所云蓋謂天壤之內不啻萬國國各有俗不欲驟使變革豈以不拜天子之詔爲禮俗也且王之國臣子不拜受教令王以爲何如光昺亦不再答也十二年日昃已卒光昺復改元寶符尋上書陳情曰微臣僻在海隅得霑聖化十有餘年雖奉三年一貢然陪臣道長亦遂疲矣至達魯花赤辱臨臣境安能空回況其行人藉恃凌轢天子雖日月竝明其能照覆益之下且臣旣席王封反立達魯花赤以監臨之是以臣之修貢爲未悅服也臣恭遇天朝建儲冊后大恩霽霈施及四海輒敢哀鳴伏望聖慈矜恤今後二次發遣綱貢一詣鄯闐奉納一詣中原拜獻竝乞易達魯花赤

爲引進使書未達詔復諭以六事且已遣阿撒兒海牙充達魯花赤十三年宋主熈降光昺遣使入貢以奏就鄯闡納貢涉不敬上表謝罪而仍乞免六事十五年光昺卒子日烜立改元紹寶卽遣使來朝其秋帝遣禮部尙書柴椿會同館使合剌脫因等持詔切責日烜徵入朝受命先是使傳本由鄯闡黎化帝命椿自江陵出邕州徑造其國日烜以非故事乞回軍舊路以進椿牒以奉上命日烜乃差御史中贊杜國計迎待如儀旣入館日烜就見焉越二日日烜拜受詔書而仍舊宴使者於廊下椿等不可乃改宴集賢殿日烜因言昔諭六事已蒙赦免竝請加憐免親朝之禮椿等不應而還日烜卽遣使奉表懇陳兼貢方物及二馴象帝必欲致日烜十六年宋衛王昺亡於崖山帝復使柴椿再徵日烜日烜卒不行因稱病而以其叔父遺愛入覲帝以日烜不請命而自立又不

應召大不敬十八年遂立安南宣慰司以下顏帖木兒爲參知政事行宣慰使都元帥尋詔立遺愛爲安南國王然日烜益不遜拒下顏帖木兒不納其歲遂殺遺愛會討占城久不服二十年帝命荆湖占城行省諭日烜助國兵糧日烜答書語滋堅驚明年又以人言其與占城同謀復致書行省曰占城乃小國內屬大國致討所當哀籲然未敢言者蓋天時人事小國亦知之矣今占城遂爲叛逆是不能知天知人者也知天知人而反與不知天知人同謀雖三尺兒童亦知其弗與況小國乎幸貴省裁之逾二歲鎮南王脫歡奉詔征占城取道安南諭日烜備糧開路日烜益疑爲晉人之假途滅虢也遂調兵拘守要害於是鎮南王大怒進破其國興道王兵於萬劫日烜乃不遣使而棄書道上以詒鎮南王復引前詔以爲國兵素約不入我境今則不然是太子違誤非本國違誤

也鎮南王遂入其國則日烜已遁入海其弟昭國王益稷以其宗族及官吏降湖廣左丞李恆進追日烜於海洋敗之幾獲其世子已而占城右丞峻都自占城北入安南與大軍會取地千餘里敗其昭明王兵擊其昭孝王大僚護皆死然軍已乏食鎮南王令峻都就食天長又以入夏疾疫大作遂議班師而日烜已遣興道王懷文侯等過其歸路李恆戰死峻都以未知師還爲安南所攻亦死事各具其傳中是歲日烜復襲父名曰威晃自稱尊號曰大越憲天體道大明光孝皇帝尋自爲太上皇后爲顯慈順天皇太皇寶曰昊天成命之寶而傳位於其子曰燾爲皇帝改元重興太子妃爲皇后然政事仍決於日烜帝以是役喪二大將怒甚明年詔諭安南百姓數日烜罪惡乃封陳益稷爲安南國王賜符印秀峻爲輔義公奉陳氏祀申命鎮南王脫歡湖廣左丞相阿里海牙以

兵納益稷兵方入境日烜復棄城遁時湖南宣慰司上言連歲海上用兵賦役繁重百姓罷於轉輸士卒死於瘴癘羣生愁歎四民廢業貧者棄子以偷生富者鬻產而應役今復動百萬之眾虛千金之費非所以恤士民也湖廣行省亦奏言本省鎮戍凡七十餘所士卒精銳者皆以征戰罷於外每一城邑不過存老弱二百人竊恐奸人得以窺伺虛實也且往年輸糧三萬石民且告病今復倍之將若之何帝卽命還師益稷從還鄂俟後舉二十四年帝以日烜終負固必大懲創之乃已於是復命鎮南王脫歡南征立征交趾行省奧魯赤平章政事烏馬兒樊楫竝參知政事詔發江淮江西湖廣蒙古漢券軍七萬人船五百艘雲南兵六千人海外四州黎兵萬五千海道運糧萬戶張文虎費拱辰陶大明運糧十七萬石分道以進又命湖廣右丞程鵬飛領本省兵竝發新附軍千

人從湖廣左丞來阿八赤進討安南日烜復遣使入貢其冬奧魯赤從鎮南王由東道女兒關來阿八赤爲前鋒程鵬飛由西道永平破老鼠陷沙茨竹三關十七戰皆捷烏馬兒樊楫由海道經王山雙門安邦口擊破其兵船四百艘斬首四千餘級鎮南王遂進次茅羅港安南興道王遁乃渡富良江薄其都敗其守兵日烜父子走敢喃堡明年鎮南王軍復至敢喃堡日烜復走入海於是鎮南王懲前敗先引兵還萬劫來阿八赤凡攻下堡三十二斬首數萬級得米十一萬餘石烏馬兒自大滂口趨塔山擊破其船千餘艘得米四萬石時惟來阿八赤請出兵分定其地而急追日烜日烜先令其國人皆匿粟而空室以待又日以且降傳語誤諸將已而張文虎糧船以去歲沈於綠水洋費拱辰等船多爲風漂皆不至諸將以畏暑瘴復請班師於是日烜分兵三十餘萬遮女兒關

鎮南王自盩州閒道乃還來阿八赤及樊楫皆戰死事在來阿八赤傳日烜尋遣使來謝進金人代己罪帝乃命劉庭直李斯衍萬奴等持詔復諭日烜來朝二十六年收征交趾行省符印日烜復遣使來貢方物二十七年復貢二十八年日烜又貢竝謝不朝之罪時守永州兩淮上千戶蔡榮上言安南未平由朝廷賞罰不明將帥不和士不用命坐失事機也書奏不報明年日烜卒日烜已先襲位仍改元興隆尋遣使來告襲爵帝終不忘安南之梗復謀進討丞相完澤平章政事不忽木請許其自新於是帝命張立道爲禮部尚書使安南日烜亦願來朝但求先降詔貸以不死會有人言必先朝而後赦遂不敢至而以其臣阮代之何維巖奉表修歲貢帝乃復遣吏部尚書梁曾再諭安南三十年曾還日烜終不入朝而遣使來貢如初乃拘留其使於江陵復議出師不忽木奏

立湖廣安南行省市蠶船儲器仗命陳益稷與諸王亦里吉解湖廣平江政事劉國傑軍會於長沙會明年帝崩成宗卽位乃寢兵歸其使日燁卽遣使慰國哀竝獻方物帝乃遣禮部侍郎李衍兵部郎中蕭泰登齋詔撫綏安南大德五年完澤奏安南使臣鄧汝霖竊畫宮苑圖本私買輿圖禁書又鈔寫陳言徵收交趾文書及私記北邊軍情及山陵等事宜遣使責以大義因詔日燁以汝霖不合法宜窮治朕以天下爲度敕有司放還自今使介必擇人陳說必盡惻忱勿憚改圖以詒後悔武宗立屢遣使來貢至大四年日燁傳位於其世子日養改元大慶日養卽遣使來朝皇慶二年安南犯邊湖廣行省詰責安南回牒輒詭辭飾過行省因上言宜遣使諭安南歸我土田返我人民而究其主謀開釁之人戮於境上仍正疆界無令侵越帝以安南使至卽詔諭之自是疆場頗安不

敢大擾矣至治三年日養復傳位於其世子日燿改元開泰明年泰定元年日燿遣使來貢日燿一名翦或誤分二字以爲天明也尋遣使來貢致和元年日養卒日燿復改元開祐至順二年復傳位於其世子日焯不改元而遣使來貢日焯後更名端午元統二年順帝以卽位遣吏部尙書帖住禮部郎中智熙善使安南賜以授時秣後至元元年封爲安南國王六年日燿卒日焯乃改元紹豐自後中原多盜南北阻絕安南乃不復至十八年日焯復改元太治亦稱日燿載籍或歧焉白日焯以下皆未嘗請封故累世帝於其國而上表但稱世子不敢稱王懼討也端午受封後乃始稱王云益稷妻子皆爲安南所殺訖不能復國遂居鄂遙授湖廣平章政事成宗賜以田二百頃武宗詔加金紫光祿大夫儀同三司天祚二年卒詔賜錢五千緡至順元年諡曰忠懿王



占城漢末林邑國也唐改曰環王國以王所居曰占城列國曰齊國後周顯德五年入貢始自稱占城國云宋時數來貢賜其王白馬兵器遂以爲例宋末見滅於真臘其王遂爲真臘人也廣王航海時宋臣陳宜中沈敬之皆走入占城不返其地西南皆界真臘北接安南東臨海距瓊州順風一日行至元十五年泉州左丞唆都以宋平遣人至占城還言其王失里咱牙信合八刺麻合迭瓦有內附意十六年同馬八兒諸國遣使以珍物及犀象來獻因詔諭其王親朝明年復遣兵部侍郎教化總管孟慶元持詔諭占城令其以子弟或大臣入覲十八年占城遣使奉表降竝復貢犀象帝以占城旣內屬遂封失里咱牙信合八刺麻合迭瓦爲占城郡王竝授榮祿大夫佩虎符而就其國立行省命唆都爲右丞劉深爲左丞兵部侍郎也里迷失參知政事以撫安占城十九年占城

王子補的專國惡行省之立不利於己也會萬戶何子志千戶皇甫傑使暹宣慰使尤永賢亞蘭等使馬八兒道經占城補的皆執之帝乃大怒命發淮浙福建湖廣軍戰船千艘屬唆都進討諭之曰老王無罪逆命者其子也討逆而已無殺百姓一人明年唆都遂至占城擊破其兵二十萬入其木城於是補的棄行宮燒倉廩殺永賢亞蘭與其父俱逃入山谷唆都兵入大州補的復殺何子志皇甫傑等百餘人而屢遣人以寶物來見復詐言且降以緩國兵有居占城唐人曾延者來言國王逃於大州西北鴉候山聚兵約二萬餘且詣交趾真臘閩婆借兵未至唆都猶未之信也旣而獲謀者問之實如曾言唆都乃遣萬戶張容進兵容以山林阻隘不能進復爲占城邀其歸路力戰始還營唆都遂傲占城造木爲城闢田以耕而遏占城於鴉候山占城亦不敢出也二十一年朝

六書 卷一百 十  
廷以峻都頓兵海外乃命征東丞相阿塔海發兵萬五千人船二百艘以助峻都已而不果行荆湖占城行省奏言萬戶忽都及烏馬兒將兵赴峻都軍至舒眉連港不知所向尋萬戶劉君慶軍至新州獲占城人問之則言國兵已還君慶因使爲鄉導而遣百戶陳奎使其國其王遣阿不蘭以書降具言大軍所蕩國藏已空來歲當遣嫡子以方物進尋遣其孫路司理勒螿奉表詣闕是時峻都實未還而以懸師深入故壘已空偵者莫知所在乃信占城人詭辭忽都烏馬兒劉君慶帥揚州軍二萬援峻都本懦弱不敢往多飾詐以報行省行省至不知峻都兵進退罔罔而已然占城以峻都兵兼耕戰爲久駐計大恐故亟求歸順帝猶以爲補的未獲難遽息兵又方欲藉占城事以敝安南故未之許也俄詔鎮南王脫歡帥師出征占城占城乃復遣大羅盤亞羅日加翳大巴南等

十一人奉表詣闕獻二象乞回峻都軍願以土產歲修職貢帝亦不允占城不得命益懼復使天羅盤亞羅日加翳等奉表賀聖誕節獻禮幣及象二占城舊州主寶嘉婁亦奉表入附明年遣太史院官往占城測候日晷尋以安南拒命命峻都返軍會鎮南王於安南事具峻都傳自是占城遂罷征亦常守禮節不敢萌異志矣初占城本安南屬國其後乃均禮久之占城益弱其王遂爲安南所執延祐三年詔湖廣行省諭安南歸占城國王至治三年其王遣弟保祐八刺遮貢方物致和元年復來貢方物至順三年遣其臣阿南那那里沙等奉金書表入貢後至元元年遣使獻方物且言安南邊其貢道詔遣使開諭焉

真臘隋時舊國也唐時南方人謂之吉蔑本扶南屬國後并扶南而有之元時北接安南南際海西接羅斛東接占城有大河自羅

斛來南流入於海漢之僕水也漢書言僕水入勞非也亦曰占臘元貞元年遣使招諭之乃始臣服然貢獻不至英宗卽位遣馬札兒使占城占臘龍牙里索馴象龍牙里蘇木都刺之北僧急力東南小島也泰定二年遣使奉表進方物天祿二年占臘復貢羅香木及象豹白猿

羅斛亦曰羅越其先扶南之屬地也唐爲墮和羅國後屬於真臘元時自爲國北接暹南臨海東接真臘西接緬有二水同自暹來東河入於真臘西河注於海都在西河上地產名香號羅斛香亦有犀象地腴宜稻人皆樓居播種後人卽升樓天卽雨數月水浸漲至數尺浸漫至樓下稻長水中八月水退則稻熟矣其米長顆異於他處其風俗男子不能蒞事事皆決婦人以婦人智量勝也至元二十六年羅斛及女人國遣使來貞二十八年其王遣使上

金書字表仍貢珍物事具世祖紀大德初復入貢至正時併有暹地或曰暹少食因降於羅斛爲一國焉

暹亦扶南之屬唐迦羅舍弗也後爲真臘屬地元時自爲國北接雲南東接安南西接緬南羅斛也地多山有大水二皆源雲南入於羅斛暹人嘗與麻里子兒有隙相讎殺元貞元年暹王遣使進金字表乞朝廷遣使至其國未至已先遣使矣乃賜來使金符使急還追詔使同往因諭暹人勿傷麻里子兒以示善鄰之誼及大德三年暹及沒刺由羅斛諸國各以方物進貢暹王上言其父在時嘗朝賜白馬及金縷衣乞從其例帝以丞相完澤合刺合孫言彼小國而賜以馬恐其鄰忻都思輩譏議朝廷遂止賜金縷衣復賜暹世子虎符延祐六年遣使來貢方物沒刺由者南蕃種落之名亦稱沒刺子卽麻里子兒也在暹西南處於毯陽丁呵奴急蘭

亦帶僧急力等地之西婆羅闍婆蘇木荅刺諸西南海島亦多沒刺由人焉其後暹爲羅斛所併

僧急力亦曰僧急里古頓遜國也梁書言扶南南界三千餘里有頓遜國在海崎上城去海十里有五王并羈屬扶南其東界通交州西界接天竺安息徼外諸國往還交市所以然者頓遜迴入海中千餘里漲海無涯岸船舶未曾得徑過也其市東西交會日有萬餘人珍物寶貨無所不有唐則墮和羅之屬也元時東西道通使舶往還者言有二道自瓜哇蘇木都刺之間出僧迦刺國以達馬八兒俱藍及靖遠王國爲孔道自僧急力麻里子兒蘇木都刺之間出僧迦刺國爲閒道而僧急力道爲近其國之後有大山自北而南蜿蜒數千里其北爲緬與暹及羅斛之界其南則如人以一臂斜舒海中山如綫貫人臂上僧急力其垂盡處也麻里子兒

在山西丁呵兒在山之東而際於海毯陽在其北急蘭亦解在丁呵兒之南亦曰急蘭亦帶皆古五王之遺又皆麻里子兒之種落也至元二十三年馬八兒須門納僧急力南無力馬蘭丹那旺丁呵兒來來急蘭亦解蘇木荅刺十國各遣子弟上表來覲竝獻方物二十九年毯陽同沒刺子亦遣使入朝成宗卽位遣還其後毯陽數有貢獻

緬唐書謂之驃宋史曰蒲甘事各具其傳中緬之名亦見於宋時其國有大河自永昌南流至其國之東注於海禹貢所謂黑水也國在雲南邊外南際海東接暹羅斛西接東天竺與暹界有山脊長數千里極南入僧急力云蒲甘其都也別有一水自金齒西流曰阿昔江入於阿禾江合流至江頭城歷大公蒲甘西而南注海俗重僧以貝葉寫書人善浮水產象犀椰子曰氎布兜羅綿石油

至元八年大理善闡等路宣慰司都元帥府遣乞斛脫因使緬招其內附十年復遣使降詔諭之十二年建甯路安撫使賀天爵言得金齒頭目阿郭所云乞斛脫因之使緬王以爲故父阿必所指也甚恨故領兵數萬來侵執之而去不得已厚獻其國乃得釋今白夷頭目是阿郭親戚與緬鄰其言入緬有三道一由天部馬一由驃甸一由阿郭地俱會江頭城阿郭卽引導也帝意猶未急征討十四年緬人以金齒干額總管阿禾內附怨之攻其地欲立寨騰越永昌間會是時大理路蒙古萬戶忽都總管信苴日方伐蒲驃諸蠻遂帥師疾行以援阿禾大敗其眾尋雲南宣慰使都元帥納速刺丁復帥蒙古爨爨摩些諸軍三千八百以征緬至江頭降其戶三萬五千二百以天熱還師十七年納速刺丁上言緬地形勢在臣目中今益兵萬人征之足矣於是帝乃發四川及思播敘

諸兵及亦奚不辭蠻以諸王相吾答兒督雲南右丞大卜參知政事也罕的斤征緬二十年相吾答兒至南甸議分軍爲三道大卜自羅必甸進也罕的斤取道阿昔江達鎮西阿禾江造舟順流至江頭斷其水路而自將一軍從驃甸徑抵其國與大卜會命諸將分地攻取破其江頭城擊殺萬餘人復進攻建都大公城拔之建都及金齒十二部皆降相吾答兒遣使上地圖陳形勢復進所得珍珠珊瑚異絲七寶束帶明年緬王遣其鹽井大官阿必立相至驃甸乞降降旨許其悔過乃敢差官赴闕尋遣鎮西平緬招撫使怯烈使其國亦未卽入貢二十三年立緬中行省雪雪的斤爲左丞阿台董台參知政事又命脫滿答兒爲征緬都元帥張萬爲之副以征緬二十四年軍至忙乃甸緬王庶子不速速古里爲逆囚王而殺其嫡子三人詔更以李海刺孫爲征緬行省參知政事募

能通白夷金齒路者張成劉全竝爲招討使佩虎符從征其歲雲南王也先鐵木兒督諸將進至蒲甘以深入喪師七千餘人然緬人懼謝罪乃降自是遂定三年一貢緬亦自是遂弱欲稍藉元威自固大德元年緬王的立普哇拏阿迪提牙遂遣其子信合八的奉表入朝請歲輸銀二千五百兩帛千匹馴象二十糧萬石詔封的立普哇拏阿迪提牙爲緬王賜銀印信合八的爲緬國世子賜虎符三年緬復遣世子奉表入謝自陳部民爲金齒殺掠率皆貧乏以致上貢金幣愆期帝閔之命止間歲貢象而已四年緬王爲其弟阿散哥也所弑其子窟麻刺哥撒八逃詣京師帝命忙兀圖魯迷失帥師問罪賊與八百媳婦合勢拒命更命雲南平章政事辭超兀兒參知政事高慶益兵萬二千人征之詔立窟麻刺哥撒八爲緬王辭超兀兒圍緬兩月城中以薪食盡將降慶等受其賂

以瘴辭輒引還詔誅之而奪辭超兀兒官阿散哥也尋詣闕伏罪詔罷兵其後歲貢不絕散見諸本紀泰定三年緬王荅里也伯以國亂來乞師詔雲南就近安撫之四年荅里必牙復請立行省於迷郎崇城不允後至元四年竟立邦牙等處宣慰司都元帥府竝總管府焉金齒者在緬上游南入永昌西接東欣都思東蒲驃及八百媳婦至元七年命征金齒驃國五部未降者十五年置柔遠等六路一睽而統以金齒宣撫司二十一年金齒西南夷十二部始悉來降以初爲緬制緬破乃歸國也近金齒者復有車臣八百媳婦之屬車里東接元江亦曰徹里元貞二年車里結八百媳婦爲亂雲南行省言大徹里與八百媳婦犬牙相錯今大徹里降小徹里復占扼地利多相殺掠大徹里胡倫乞別置一司擇通習蠻夷情狀者爲之帥招其來附以爲進討之地遂立徹里軍民總管

府又立蒙樣剛等甸軍民官明年八百媳婦與小徹里復攻胡倫  
來告急雲南行省乞以二萬人征之大德四年朝命雲南左丞劉  
深調湖廣江西河南陝西浙江五省兵二萬人往討遂有順元之  
亂事已具阿察傳其時南臺御史陳天祥言八百媳婦乃荒裔小  
夷不足以爲利害語亦在天祥傳中疏上不報七年劉深竟誅死  
征蠻軍罷其後至大四年八百媳婦復與小徹里作亂大徹里亦  
附之詔雲南右丞算只兒威往彼招諭受賂被紿敗還延祐二年  
始獻馴象二泰定二年車里復入寇後事佚四年八百媳婦遂請  
官乃置蒙慶宣慰司都元帥府及木安木傑二府至順二年二府  
竝爲路立軍民總管府

馬蘭丹在瓊州對海東南洲上古曰陵迦鉢拔多州者也隋書言  
使者常駿自南海郡乘舟至焦石山東南泊陵迦鉢拔多州西與

林邑相對上有神祠焉又南至師子石島嶼連接元時國曰馬蘭  
丹其西正與占城對海地產金珠玳瑁水片海參燕窩人皆沒刺  
由番族至元二十三年同馬八兒等十國入貢其後無聞

不憐八亦曰八羅孛在南海中與古婆羅國同洲隋謂之波羅刺  
隋書言常駿至師子石又行二三日西望見狼牙須國之山於是  
南達雞籠島至於赤土之界又言赤土東波羅刺西婆羅娑南訶  
羅巨國北距大海地方數千里元時無赤土國而有不憐八蓋昔  
之波羅刺并赤土而有之西爲吉利門史弼高興伐瓜哇大軍進  
吉利門者是也唐書又言自赤土西南入海乃得婆羅宋之勃泥  
乃此國也洲因國而名故亦曰婆羅洲焉其國正在不憐八南舟  
行自西轉南乃至至元九年亦黑迷失使海外至不憐八十一年  
偕其國人以珍寶來朝十二年亦黑迷失再使其國與其國師以

名藥來獻至大四年武宗以張也先伯顏使不憐八孫僻徹兀李唐徐伯顏使八昔不憐八貢獻竟不至八昔在其洲之東宋勃泥屬地洲長二千七百里闊二千五百里北去瓊州大海數千里西南與蘇木都刺南與瓜哇葛郎對海葛郎卽訶羅旦也國中有大山分爲數枝來來者在其山中小部落也亦曰刺刺至元二十三年同馬八兒等國入貢三十年史弼復遣郝成等諭焉洲物產與諸洲同惟金剛比諸國爲良

速龍在南海中洲上居八昔之東馬蘭丹之南國皆小島產明珠玳瑁蘇木豆蔻降香藤條自古不通中國俗少粒食食魚蛤短髮纏阜縵天氣物產多與瓜哇同大德三年同速古臺探奔奚里諸番以虎象及杪羅木舟來貢奚里在速龍南島分四枝如人臂股人剛猛好武物產與諸島同速古臺探奔瓜哇之屬也

瓜哇在南海中閩婆洲上洲亦曰社婆亦曰社薄宋書言呵羅單國治閩婆洲梁書言婆利國界東西五十日行南北二十日行有一百三十六聚土氣暑熱如中國之盛夏穀一歲再熟草木常榮隋書言自交趾浮海南過赤土丹丹乃至婆利國蓋婆利國大擅有全洲而呵羅單但治其洲上未知爲之屬抑鄰邦小國也呵羅單亦曰訶羅旦在赤土國南與之對海又有婆皇婆達宋文帝時同婆利入貢竝除授中國官號至梁以後惟稱婆利唐書言訶陵東距婆利西墮婆登又言王居閩婆城復東遷於婆露伽斯旁小國莫不臣服則又以訶陵主閩婆洲蓋呵羅單之變名也其後宋時有閩婆國卽古婆利元瓜哇也訶陵則元爲葛郎其小國又有速古臺探奔打馬之屬或曰探奔者其國官名以爲地名者誤也古火山國在其洲之南梁書又曰自然大洲有樹生火中者也或



元書 卷一百一  
曰瓜哇與沒刺由皆以種呼其國云至元十七年世祖遣使諭瓜哇降瓜哇不至然使命不絕久之帝遣右丞孟琪往瓜哇爲所黥帝乃大怒二十九年遂發福建湖廣江西兵二萬人設左右都元帥府四上萬戶具舟千艘給糧一年以史弼高興亦黑迷失竝平章福建省事以征瓜哇并給鈔四萬錠虎符金銀符金衣段備賞有功明年軍至吉利門會是時葛郎與瓜哇相攻瓜哇大敗其王哈只達葛那加刺已爲葛郎所殺弼等入其國自杜竝足過戎牙港至麻喏八歇瓜哇王女婿土罕必闍耶遣其宰相昔刺荅吒耶等五十餘人請降大軍會於八節澗其地上接杜馬班王府下自莆奔入海乃瓜哇之亢也其謀臣希甯官泊舟觀成敗不肯納欵於是弼等乃攻之希甯官宵遁遂留兵守八節澗而水陸進兵已而葛郎兵亦進至麻喏八歇土罕必闍耶遂遣使以其國山川戶

口及葛郎地圖來上求大軍救之弼與高興亦黑迷失擊破葛郎而土罕必闍耶卽乞歸易降表及所藏珍寶入朝於路遂殺護送二萬戶以叛弼等還帝予之杖以恥之事在弼傳方葛郎追土罕必闍耶於麻喏八歇也高興戰敗之卽分兵爲三道以向其都荅哈城葛郎以兵十餘萬戰而潰入河死者數萬人殺五千餘人進圍其城明日葛郎王哈只葛當出降興竝執其子昔刺丹不合於山谷乃盡俘其妻子官屬會瓜哇復叛興等恐其爲亂因竝殺之是時招諭來降者沒里在闍婆洲之東小島也因史弼上金字表及犀象等物亦黑迷失招降南巫里速木都刺不魯不都八刺刺木由來諸國不魯不都八亦在洲東木由來卽沒刺由種類之名也及南巫里速木都刺刺見別傳其後葛郎無聞而瓜哇以大德元年遣舍刺班直木達奉表乞降歷數世貢獻不絕致和元年

詔優護瓜哇國主札牙納哥仍賜衣帛弓矢至順三年復遣僧伽刺等奉金書表及方物來朝貢至正二十三年順帝因其使者賜其王三珠虎符及衣錦文幣洲四時長夏炎風暴厲觸之生疾得水而解凡其地長二千四百里闊三百五十里米價極賤其貢物香藥寶石珍珠而以薔薇露爲良

蘇木都刺亦曰速木達曰速木荅刺海南一洲之大名也在僧急力麻里子兒西南而隔大海其洲長三千五百里闊一千里形如側蕉葉首西北而尾東南中有大山山陽地狹而山陰廣產黃金銅鐵藥有血竭冰片獸有水馬狒狒熊虎木多椰子處處成林國都島東臨海地窪下海潮浸漲或曰蘇木荅刺爲古毘騫國梁書所言頓遜之外大海洲中又有毘騫國者也然言其王身長丈二頭長三尺自古不死莫知其年者妄也其洲本居數國宋時有三

佛齊古干陀利也元時以州名其國而兼稱三佛齊至元十七年唆都請招三佛齊等八國世祖不從十九年世祖遣使者楊庭璧至俱藍蘇木都刺遣人因俱藍王乞降庭璧還至其國國王土漢八的迎使者以入卽遣其臣哈散入朝二十三年復貢方物有龍涎香言取之國西小島中每春羣龍交戲遺涎於地夏復採云南無力亦曰南巫里在蘇木都刺洲上正西濱海山有降眞香名蓮花降亦有犀牛西北海中有大山曰瑁山半日可到商船往還悉投此山海水中生黑珊瑚至元二十三年同須文那等入貢二十九年復遣使從亦黑迷失使者入朝成宗初遣南無力蘇木都刺繼沒刺由毯陽使者各還其國賜以三珠虎符及金銀符金幣衣服有差

阿魯在蘇木都刺洲北西與須文那接其北有羣島皆阿魯之屬

也元貞元年其酋遣弟脫杭忽先來朝成宗賜其酋以虎符  
須文那在蘇木都刺西北偏其國無城郭有大溪淡水流入於海  
其潮水一日長落二次其海口浪大常有舟投沒其國南去大深  
山北大海東亦大山西連二小山至元二十三年同馬八兒蘇木  
都刺入貢其後無聞

那旺在蘇木都刺西海中小島也至元十九年楊庭璧使俱藍還  
至其國說下其王忙昂以其國無識字者遣使四人不奉表二十  
三年復同馬八兒等國入貢

論曰大禹之興也聲教訖於四海當是時暨稷播奏庶艱食鮮食  
蓋漁獵以助稼穡況海島彈丸草木蕪穢莽無居人者哉然懋遷  
有無化居始於此矣自漢以來漸通海道於是鮫人奇琛得入天  
府嗜欲將至有開必先天不欲地有棄壤而不霑聖人之澤也惟

帝王以不貪爲寶犀貝珠香豈足多乎元祖測畧占城復三古之  
蹟又收吉貝以入中國使兼桑麻之制溥衣食之原其惠民也大  
哉

元書卷一百

門人曾紀敘襄校  
門人曾士琮詳校

劉仁蔭 刊

元書卷百一

邵陽曾廉撰

韓林兒徐壽輝張士誠方國珍列傳第七十六

韓林兒真定欒城人也其先以白蓮會燒香惑眾徒置永年父曰山童至正初益鼓妖言謂天下當大亂彌勒佛下生明王出會棗陽人生子甫晬暴長四尺許皤腹擁腫人果以為彌勒佛矣又時方開黃河山童陰作石人一眼埋之當道而鐫其背曰石人一隻眼挑動黃河天下反河丁掘得之河南江淮間益相驚詫潁州人劉福通與其黨林遵道羅文素盛文郁等因詭言山童宋徽宗八世孫走海外得還當主中國福通劉光世後當輔之乃刑白馬黑牛誓告天地謀作亂以紅巾為號十一年事覺福通等遽入潁州反而山童為吏所捕誅妻楊氏與林兒逃武安山中福通據朱皋

破羅山上蔡真陽確山舞陽葉縣汝甯光息等州眾至十餘萬官軍不能制而徐壽輝復起斬黃布王三大孟海馬等起湘漢李二彭大等起豐沛郭子興亦據濠與相應時皆謂之紅軍亦稱香軍丞相脫脫言於朝曰河南漢人反宜榜示天下悉勦捕之諸蒙古色目遷謫者宜皆召還都無令註誤於是榜出河北之民亦有變而從紅軍者矣頃之脫脫督諸軍征李二於徐州屠其城師還賊益滋蔓十五年福通物色林兒得諸碭山夾河迎至亳僭稱皇帝又號小明王建國曰宋建元龍鳳拆鹿邑太清宮材治宮殿於亳號楊氏爲皇太后遵道文郁爲丞相福通文素平章政事劉六知樞密院事劉六者福通弟也尋福通以遵道寵用事嫉之陰命甲士搃殺之而已自爲丞相加太保事權一歸焉福通戰敗河南平章政事答失拔都魯兵於長葛已而爲答失拔都魯所乘大敗福

通於太康進圍亳福通以林兒走安豐兵復盛乃遣其黨分道略地十七年李武崔德陷破武關商州徑趨奉元察罕帖木兒提兵入潼關大敗之餘眾散走南山而毛貴陷膠萊益都濱州山東郡邑多下福通尋自帥眾攻汴梁且分軍三道關先生破頭潘馮長舅沙劉二王士誠趨晉冀白不信大刀敖李喜喜趨關中毛貴自山東北犯勢銳甚田豐者鎮守黃河義兵萬戶也叛附貴陷濟甯尋敗走福通進陷大名遂自曹濮陷衛輝白不信等陷興元遂圍鳳翔屢爲察罕帖木兒李思齊所破走入蜀十八年田豐復陷東平濟甯東昌益都廣平順德毛貴亦數敗官兵陷清滄據長蘆鎮尋陷濟南益引兵北殺河南右丞董搏霄於南皮陷薊州犯灤州略柳林以逼大都天子徵四方兵入衛議欲遷都避其鋒大臣諫乃止尋爲劉哈刺不花所擊敗還據濟南而福通出沒河南北復

元書 卷百一  
二  
攻汴梁陷之遂迎林兒都馬關先生破頭潘又分其軍爲二一出絳州一出沁州踰大行破遼路遂陷冀甯攻保定不克陷完州掠大同興和塞外諸郡至陷上都毀諸宮殿轉掠遼陽抵高麗十九年陷遼陽殺懿州路總管呂震順天子以上都宮闕盡廢自此不復北巡矣李喜喜餘黨復陷甯夏略靈武諸邊地是時承平久州郡皆無守備總兵官亦震賊勢輒棄城遁或遇賊自潰以故所至無不摧破然林兒本起盜賊無大志又聽命福通徒擁虛名諸將在外者率不遵約束所過焚劫至啖老弱爲糧且福通故等夷福通亦不能制兵雖盛威令不行數攻下城邑官兵亦數從其後復之不能守惟毛貴稍有智略在濟南立賓興院選用元故官姬宗周等分守諸路又於萊州立屯田三百六十所每屯相距三十里造輓運大車百兩凡官民田十取其二多所規畫故得據山東者

三年及察罕帖木兒數破賊盡復關隴遂大發秦晉之師會汴城下屯杏花營諸軍環城而壘林兒兵出戰輒敗嬰城守百餘日食將盡福通計無所出挾林兒從百騎開東門遁還安豐後宮官屬子女及符璽印章寶貨盡沒於察罕帖木兒時毛貴爲其黨趙均用所殺有續繼祖者又殺均用所部自相攻擊獨田豐據東平勢稍強二十年關先生等復犯上都田豐陷保定朝廷遣使招之被殺士誠又躡晉冀李羅帖木兒敗之於臺州遂入東平與豐合而李武崔德以逗撓爲福通所責因詣李思齊降李喜喜已走死關先生沙劉二破頭潘入高麗王都高麗誘與爲姻婭因藏其馬而殲之關先生沙劉二皆死惟破頭潘以餘眾走大同李羅帖木兒擊降之察罕帖木兒既定汴梁遂遣子擴廓帖木兒討東平脅田豐王士誠降乘勝定山東惟陳孫頭獨守益都不下與福通遙爲

聲援二十二年豐士誠復反乘閒刺殺察罕帖木兒入益都朝廷復使擴廓帖木兒總兵圍城數重孫頭等告急福通自安豐引兵赴援擴廓帖木兒邀擊之於火星步大敗走還因急攻益都穴地道以入殺豐士誠而械送孫頭於京師林兒自是黨與大衰明年張士誠遣將入安豐殺福通初郭子興據滁和既卒有子曰天叙天祐女婿曰朱元璋林兒因以天叙爲都元帥天祐元璋爲左右副元帥其後天叙天祐皆爲義兵元帥陳瑛先所殺元璋勢日盛然以林兒稱宋後四方響應亦用其年號以令軍中至是救安豐迎林兒歸滁州居二歲死或曰元璋使人沈之江也

徐壽輝一名真一蘄州羅田人也以販布爲業袁州僧瑩玉以妖術鼓煽湖湘間麻城鄒普勝師其術謀作亂見壽輝浴於鹽塘有光異之因與黃陂兒文俊等共推爲主至正十一年聚眾攻陷蘄水及黃州壽輝遂僭稱皇帝以蘄水爲蓮臺省僞號天完建元治平以普勝爲太師文俊爲上將明年壽輝遣其屬丁普郎等陷漢陽興國鄒普勝陷武昌走威順王寬徹不花遂破安陸沔陽及中興路由是舳舻蔽江而下江西大震遂乘勝渡江陷江州害總管李黼已又連破袁瑞饒信徽等郡縣遂進破昱嶺關陷杭州總管董搏霄帥兵奮擊大破之復其城並復徽州然壽輝勢復日盛其將趙普勝周驢等擁眾據池州太平諸郡眾號百萬江西平章政事星吉等與戰敗之復江州尋敗死於湖口十三年江浙平章政事卜顏帖木兒再復江州進與西甯王牙罕等軍攻克蘄水獲其官屬四百餘人壽輝走倪文俊營得免是時武昌漢陽亦復壽輝勢稍衰而丞相脫脫督師淮南乃檄諸將各散去分守鎮地威順王既還武昌而倪文俊復陷沔陽王出師討之而敗王子報恩奴

被殺文俊尋進陷中興路復犯漢陽陷之十六年文俊建僞都於漢陽迎壽輝居之壽輝以文俊爲丞相遂引兵陷湖南常衡澧岳然文俊猶挾威順王子荅帖木兒爲質請降求平章湖廣久之朝廷堅不許亦殺之文俊旣日張以壽輝已失都會而已重立之漸不樂屬於壽輝壽輝爲人本木強無他能徒爲人擁戴枵然尊大文俊益輕之初沔陽人陳友諒與文俊皆漁家子也文俊之攻湖廣友諒來依之爲其簿掾尋領兵稱元帥旣見文俊專恣不能平十七年文俊遂謀害壽輝不克奔黃州友諒因乘釁襲殺之并其兵自稱宣慰司尋稱平章政事明年陷安慶害淮南左丞余闕又陷龍興瑞州分兵取邵武吉安而自以兵入撫州已又陷建昌贛汀十九年陷信州害江東廉訪使伯顏不花的斤由是友諒恃其強數與朱元璋爭池州太平往來掠境上壽輝見友諒已取龍興

則竊大喜欲徙都之友諒不可而壽輝已發漢陽次江州江州友諒治所也甚不利其來因伏兵郭外迎壽輝入卽閉城門盡殺其所部卽江州爲都以居壽輝而自稱漢王置官屬二十年友諒遂挾壽輝東下以攻太平乃使人陽白事壽輝前而令壯士自後持鐵搥擊之碎其首壽輝凡僭號十年而死壽輝死友諒卽以采石五通廟爲行殿稱皇帝僭號漢改元大義太師鄒普勝以下皆仍故官友諒性雄猜好以權術馭下旣盡有江西湖廣之地於是與朱元璋日相爭戰二十三年遂爲朱元璋殄之於鄱陽湖其子理後遂降明明玉珍者隨州人長八尺餘目重瞳信義爲鄉里所服因團結千人屯青山已而降於壽輝以元帥守沔陽沔饑因帥斗船五十艘掠糧川峽間會義兵元帥楊漢以右丞相完者都欲圖已走出峽遇玉珍爲言重慶無重兵完者都與右丞哈麻禿不相



能可襲而取也玉珍從其策遂襲破重慶走完者都而執哈麻禿以獻壽輝授玉珍隴蜀行省右丞已而完者都會平章政事朗革歹參知政事趙資謀復重慶屯嘉定大佛寺玉珍因遣其將萬勝以輕兵襲陷成都三人皆被執死於是蜀中郡縣相次來附既聞陳友諒已害壽輝自立玉珍乃以兵塞瞿唐絕不與通而建壽輝廟於城南隅歲時致祀遂自立爲隴蜀王二十三年亦僭稱皇帝於重慶國號夏建元天統倣周制設六卿然玉珍素無遠略惟性節儉頗好學折節下士內設國子監教公卿子弟外置提舉司教生徒建社稷宗廟求雅樂開進士科定賦稅以十分取一蜀人亦便安之二十六年死于昇後亦降明

張士誠泰州人也有弟二人並以操舟運鹽爲業緣私作姦利頗輕財好施得羣輩心常鬻鹽諸富家富家多陵侮之或負其直不酬而弓手邱義尤窘辱士誠士誠甚忿至正十三年士誠卽帥諸弟及壯士李伯昇等十八人殺義並滅諸富家縱火焚其居入旁郡場招少年起兵鹽丁乃苦重役遂共推爲主陷泰州高郵守李齊諭降之復叛殺參知政事趙璉并陷興化結砦德勝湖有眾萬餘行省以萬戶告身招之不受遂襲據高郵自稱誠王僭號曰周建元天祐然猶有詔赦之士誠因給殺李齊於是平章政事福壽討之不克明年士誠攻揚州敗大司農達識帖木兒兵於是右丞相脫脫出督師圍高郵士誠數敗外城已隳城且下而天子以人言解脫脫兵柄代以他將士誠因乘間奮擊官兵潰去由是復振踰年淮東飢而江陰羣盜有朱英者已就撫復叛乃質妻子於士誠以乞兵且盛陳江南土地之廣錢糧之多子女玉帛之富以豔其心於是士誠先遣弟士德由通州渡江入常熟十六年陷平江

士誠乃自高郵徙都馬改稱隆平府毀承天寺爲王宮擇寺觀豪門爲省院部司以士德平章政事卜者李行素爲丞相蔣輝爲右丞原明爲左丞史文炳知樞密院而以李伯昇節制軍事又署鍛工周文爲隆平太守分兵下湖松諸州而苗帥楊完者數敗士誠攻嘉興之兵士誠乃遣士德閒道破杭州走左丞相達識帖睦迺完者復還救杭士德復敗歸明年士誠兵屢敗於朱元璋士德爲所禽於是士誠遂請歸國朝廷遂授士誠太尉官其將吏有差然士誠雖去僞號擅甲兵土地如故會達識帖睦迺在杭與楊完者有隙陰召士誠兵士誠遣史文炳襲殺完者遂有杭州天子遣使徵糧賜之龍衣御酒士誠自海輸糧十一萬石於大都歲以爲常旣而益驕令其下頌功德邀王爵不許二十三年士誠遂自爲吳王尊其母曹氏爲王太妃置官屬別治府第於城中以弟士信爲

江浙左丞相而幽達識帖睦迺於嘉興朝廷徵糧不復與矣當是時士誠所據南抵紹興北踰徐州達於濟甯之金溝西距汝潁濠泗東薄海二千餘里帶甲數十萬以士信及女夫潘元紹爲腹心左丞徐義李伯昇呂珍爲爪牙參軍黃敬夫蔡彥文葉德新主謀議學士陳基左丞饒介典文章又好招延賓客所贈遺輿馬居室什器甚具諸僑寓貧無藉者爭趨之士誠爲人外遲重寡言似有器量而實無遠圖士信元紹尤好聚斂金玉珍寶及古法書名畫無不充牣日夜歌舞自娛將帥亦偃蹇不用命每有攻戰輒稱疾邀官爵田宅然後起甫至軍所載婢妾樂器踵相接不絕或大會游談之士樗蒲蹴鞠皆不以軍務爲意及喪師失地還士誠概置不問已復用爲將上下媢嬉而已二十七年隆平遂爲朱元璋所破士誠被執自殺

方國珍台州黃巖人也長身黑面而體白如瓠力逐奔馬嘗販鹽海濱而同里蔡亂頭入海行劫有司懸賞格捕之國珍捕如格而賞不及怒曰獨彼能爲是耶黃巖俗尊上田主國珍父伯奇爲陳氏佃事陳甚恭國珍大憾之伯奇沒陳索租益急稍不足則揚言國珍通賊國珍益忿因給陳至爲具美醞盛饌而戕之臨其尸於甕久之事泄太守遣人來捕國珍方食左手舉几自蔽右持門闕格殺捕者遂與兄國璋弟國瑛國珉入海聚眾數千人劫運艘梗海道至正八年行省參知政事朵兒只班討之追至福州五虎門國珍焚船將遁而行省兵自相驚潰朵兒只班遂被執國珍脅使請於朝授國珍定海尉國珍以其官卑不肯受尋復叛寇溫州尚書秦不華上剿捕之策不聽十年國珍仍入海燒掠沿海州郡十一年朝廷以江浙左丞孛羅帖木兒統兵慶元以秦不華爲浙

東宣慰使分兵溫州夾擊之孛羅帖木兒兵至大閩洋國珍夜帥勁卒縱火鼓譟官軍不知所爲孛羅帖木兒復被執反爲國珍飾詞上請朝廷再遣大司農達識帖睦爾至黃巖招降國珍兄弟皆登岸羅拜退止民舍秦不華至海濱散其徒眾拘其海舟兵仗授國珍千戶兄弟皆官之藉其力以防海運十二年會朝廷征徐州命江浙募舟師北守大江國珍懷疑復劫其黨入海復揚言降誘殺秦不華而使人潛至京師賂諸權貴仍許其降十三年授徽州路治中國珍復不用命仍擁兵陷台州朝廷復以海道漕運萬戶招之而授國璋衢州路總管乃受官尋進江浙參知政事俾以兵攻張士誠士誠遣將禦之崑山國珍七戰皆捷會士誠亦請降乃罷兵於是朝廷多其功命以節鉞鎮浙東開治慶元兼領溫台金三郡國珍以國璋國珉居台州兒子明善居溫州而留國瑛自副

十八年加國珍江浙右承尋進平章政事國珍歲具海舟轉輸士誠粟達京師以功加太尉賜爵衛國公先是天下承平國珍兄弟始倡亂海上有司憚於用兵一意招撫惟都事劉基言國珍首逆數降數叛不可赦至得罪又當時出空名宣敕數十道募人擊賊海上壯士既立功所司邀重賄不輒與有一家數人死事卒不得官者而國珍之徒一再招諭皆至大官由是民慕爲盜從國珍者益眾朝廷自失江淮資國珍舟以通海運重以官爵羈縻之而無以難也有張子善者好縱橫術說國珍以師泝江窺江東北略青徐遼海國珍本起負販無遠志曰吾始願不及此謝子善去十九年朱元璋已陷婺州國珍乃遣使以溫台慶元三郡附之受其福建平章政事然國珍實圖苟免於兵而據境自若也二十六年朝廷拜國珍江浙左丞相國瑛國珉明善並平章政事國珍又數通

好於擴廓帖木兒陳友定慶元遂爲元璋所破國珍降之數年死於建康

論曰國之將興太祖始惟有博爾朮者勒蔑二人相與左右而諸族來歸及其亾也江南以官軍萬人而不能禦三十餘賊爲遠近笑何事勢之異哉故韓林兒徐壽輝張士誠方國珍之黨非能亾元也春秋曰梁亾公羊傳曰魚爛而亾也

元書卷百一

勞  
劉仁蔭 刊  
門人曾紀嶼襄校  
門人曾士琮詳校

元書卷百二上

邵陽曾廉撰

自序第七十七上

曾氏之先妣姓也自夏少康封其少子曲烈於郟爵爲子而壤地  
 褊小春秋時遂爲附庸之國不足以爭雄於諸侯故經書郟子左  
 傳世本皆無名諡云其後魯襄公之世郟世子巫如魯而郟亡遂  
 留焉越世孔子弟子有曾點子皙點子曾參子輿論語禮記稱子  
 輿曾子而公穀春秋經書其國皆作繒故郟繒曾其致一也曾子  
 之子曾元曾申元之子曾西或曰子西卽申字事久遠無可徵自  
 是而後漢有繒賀以開國功爲祁侯傳至其孫它坐射擅罷失侯  
 而當時曾氏之族或徙青州或徙冀州或徙扶風長沙後皆無聞  
 哀平之際有曰據者以逃名於新避地豫章其後又散居撫袁韶

廣泉虔交州皆據之後唐有曾衮曾元裕皆當時名將而在撫州有曰洪立當五季之時是生延鐸延鐸生仁旺仁旺生致堯爲宋尙書禮戶部郎中致堯之孫爲鞏布肇或曰晉劉石之亂衣冠南渡曾氏始有人隱洪州西山者今有家存焉李氏僭江南曾朴恥而不仕朴生延福延鐸延構鐸家盱江鞏布肇其後也泉州有曰公亮與布皆宋宰輔鞏肇並與南宋時又有曾開曾幾皆以文學著聞而鞏名尤高巍然與歐陽三蘇齊軌矣吾曾氏出自鞏伯父麻城主簿易直致堯第三子也易直子叔卿官秘書省著作佐郎宋史入卓行傳越數世爲福仲家乘載其在元元統後至元之間留於遼魯曾魯曾建言眞哥皇后配享武宗本自仲議也仲緣是唯太常博士與劉聞同舍相知交後以事謫天臨路錄事直元運而終遂遯跡至邵陽楓樹村屋上家焉因自名其堂曰遯貞作記

曰丁亥之夏余避地楚南抵邵陽太平視其山水與幽人逸韻雅相等也湖山映其南蒸水環其東南有古城之勝北盡龍山之麓余顧而樂之乃遂卜居於其地之老君塘茅其蓋竹其柱四壁蕭然晏如也居無何海內分裂戈兵四起郡邑旋復旋陷北望闕庭無淚可揮臣罪當誅漠然徒見黍離而麥秀而已維歲庚戌之冬始改相地於里之屋上遂命匠氏陶氏葺治而居之爲堂三楹室若干閒左爲思孝祠其右爲軒顏其堂曰遯貞之堂軒名之曰遯貞之軒軒之外有圃名之曰遯貞之圃而前有沼名之曰遯貞之沼曾子憩息其中手揮五弦目送水月閒賡楚聲又爲吳調或雜樵牧飲長歌蒸江之濱楚之野人皆望而知其爲山中民也客有好曾子者過而訪焉飲之酒將闌乃起而言曰先生之遯遂至是乎陽德亨矣鱗翼龍從今之運籌帷屋銘功竹帛者非昔之射策

中覆郎官百里者耶曰此非仲所敢聞也士之才不才命爾彼固其才也子薄無能向已仕矣仕而不容於世今老矣豈能復奉西家帚哉於是客饜然謝曰小人不敏焉知君子之腹哉易曰肥遯先生當之矣仲至明洪武中伏匿以終仲子曰才瑛才瑁瑛爲光祿寺丞擢衡府審理正衡王惠帝弟也未就封建文遜國瑛遂不仕瑁爲兵馬司指揮生鳳鳳舉於鄉爲舒城教諭擢國子監助教明方議賦役事瑛子友銘以寶慶灘峻急不可漕力言於大府得免由是郡人德之沒爲立祠銘子志暹年十七以發粟賑飢景泰帝有書褒美暹於屋上建敕書樓過者皆嗟歎焉銘孫景鑑爲中書舍人以詩鳴見知於茶陵李東陽五十而歸田與同縣貴州僉事楊廷芳安仁知縣李經並稱資陽三逸年皆至耄耄而終景鑑孫大東復以粟大振鄉人詔旌其門賜以七品冠帶傳有溫旨其

後數世曰廷龍當國家除代之閒開廣土田近二千頃遂以貲雄一郡有僮千人飲食笙歌是時明行人王夫之隱山谷館於龍龍子萬年萬芳皆有學行與夫之義兼師友萬芳終巴東教諭萬年子載道弟載迢迢子榮牲與其子澍弟子潏均舉於鄉姓爲陽武知縣潏衡陽教諭道子榮向向子世恕治詩經早卒婦劉氏以節孝建坊生子連連子開遠遂子宗袞皆有隱德君子稱焉袞生延浩始服賈孝養父母有子曰廉廉生於黔陽安江末三歲而盡識街衢春帖招子舉市以爲奇童十歲而能屬文十五而爲田家雜興賦義不苟貴然竟寡遇二十餘授徒爲養已而寶山朱其懿守沅州聘爲經師三十八始舉於京兆其歲日本渝盟矣廉爲人上恭王箋不見用遂從軍榆關明年以和親各罷歸復授徒於縣曰愛蓮書院旣復北行就試方欲就教職東還而康有爲倡爲新學

六書 卷百二十一 三  
簧鼓京師天下風靡矣是時有

詔求言廉因上書曰臣以孤寒下士旅食燕邸欣逢

皇上念切時艱整飭庶政之日聞

命之餘且喜且懼懼者懼其改弦易轍或失繼

志述

事之心喜者喜其因時制宜庶得居中馭外之道乃者六月十五

日伏閱邸鈔恭讀

上諭士民有上書言事者著赴都察院呈遞毋得拘牽忌諱稍有

沮格用副邇言必察之義等因欽此

天語煌煌益以見

精勤之思

虛冲之度至下逮乎芻蕘臣亦何幸得際此會然退而自思不知

皇上誠好邇言執兩而用中抑徒欲天下臣民阿諛順從以示令  
出惟行也何以言之夫治天下者神明之事非迹象之事也子貢  
曰夫子之文章可得而聞也夫子之言性與天道不可得而聞也  
學術治術其致一也故易曰盥而不薦有孚容若古之聖人必抱  
其齋戒之身孚之於事神接人之先故其移易天下爲最速而其  
所以速者有非語言文字所得而形容也是故有虞之典謨無取  
乎鋪張成周之官禮貴得其精意臣獨惜數月以來  
皇上勤求匪懈徒求之於法度之迹未及深思法度之所以行而  
言事諸臣亦莫不以將順爲美未有以治亂之機緘安危之關鍵  
以告

皇上則是以彼得明治待我

皇上而不以堯舜待我

元書

卷百二十一 自序上



皇上也臣聞烈女不辭水火故能成其烈忠臣不避斧鉞故能成其忠臣請以死嘗試以成我

皇上納言之盛其首日養

聖德蓋古王道之行在於

聖德而養

聖德莫先於防驕矜之心昔曾國藩之諫

文宗也曰廣西不平固臣工所同慮也廣西遽平而

皇上以為無難辦之事無助我之人此則一念驕矜之萌尤微臣

所大懼也曾國藩敢言而

文宗聽之不以為忤故

文宗聖主而曾國藩忠臣夫天下無其實而有其名不如無其名

而有其實故法可變而不可以新政為名是何也天下者

祖

宗之天下也

皇上為

祖

宗持守

宗廟有萬世不變之法有隨時修改之政然其所以修改者

皇上度亦無以出

列聖範圍也故必常以

祖

宗為心兢業罔墜蓋為孝子而後為仁人為仁人而後天下蒙福

後世昭其令聞伏讀近日

詔旨有曰五帝三王不相沿襲有曰開創百度有曰參預新政臣

元書

卷百二十一 自序上

五

元書 卷百一十一 五  
不諳體例顧有疑焉以爲或是承  
旨諸臣過事張皇未能悉符

聖意不然五帝三王乃異姓受命

皇上上承

祖

宗何以異姓爲比且

皇上旣自以爲新則必以

祖

宗爲舊

皇上自以爲開創則尤未知何以處

祖

宗也臣恐

皇上敬

祖

宗之意不無小弛而驕矜之念遂自此而漸萌也臣攷古今以來  
自名新法獨王安石耳近聞外間有守舊維新之議二者交相詬  
病臣嘗痛恨之以爲此乃高麗之所以危亡豈我

國家之所宜效若此

諭宣布天下則黨風愈熾何以止之宜無怪乎言事諸臣動以阻  
撓新法要

皇上以罪其人也臣謂阻撓者蓋非

盛世之論古今以來必奸臣翦排異己則名之以阻撓如

皇上以阻撓爲怒則必以依違爲喜人孰不願

皇上之喜而願

皇上之怒則依違者萬萬而阻撓者希矣阻撓者希而忠讜之言絕忠讜之言絕則讒諂面諛之人至此孟子決其國必不治者也昔曾國藩胡林翼每下一令議一事輒令僚屬不厭十反以爲駁辨愈多久乃無弊况以天下萬幾

皇上一人臨之於上竊謂宜常令諸臣詳審事理以求至當不宜獨斷於

聖心以爲言莫之違也臣又知

皇上必以爲近許諸臣皆得言事本以宏開言路並無扞格天下之心然蘇軾有言從令不如從意宏開言路

皇上之令也

皇上之意則持之甚堅人必從

皇上之意而不從其令審矣若

皇上持之果堅臣又謂此實驕矜之萌不可不防其漸也蓋驕矜之心生則寅畏之心息寅畏之心息則逸欲之心起一念之微起於至忽放於無垠

皇上亦慎之而已此臣所謂養

聖德也其二曰去邪慝蓋法可變而不可用小人以變法何也自古國之興也有定數然用君子未有不興國之亡也有定數然用小人未有不亡君子無不抗直則難進而易退小人無不希合則取巧而干位故宋自范仲淹執政已思變法而以裁抑僥倖事不果行其後王安石變之遂以亂宋安石之變法亦非盡不善也其弊在眾小人因緣而進黨同伐異以行其私於是呂惠卿章惇蔡京之徒相援當國而靖康之禍作矣蓋蔡京之爲人也王安石用則從王安石司馬光用則從司馬光凡反覆之小人未有不亂國

是凡希合之小人未有不爲反覆且夫人自以爲孔子復生天下不以爲狂自必以爲妄此情事之易見况有自命大於孔子者乎臣竊見工部主事康有爲迹其學問行事並不足與王安石比論而其字則曰長素長素者謂其長於素王也臣又觀其所作新學僞經攷孔子改制攷諸書爚亂聖言參雜邪說至上孔子以神聖明王傳世教主徽號蓋康有爲常主泰西民權平等之說意將以孔子爲摩西而已爲耶蘇大有教皇中國之意而特假孔子大聖借賓定主以風示天下故平白誣聖造爲此名其處心積慮恐非尋常富貴之足以厭其欲也康有爲之書亦咸同後經生著作之體例前列經史子舊說而後條附以己意蓋一淺陋迂謬之經生而出之以詭誕加之以悖逆浸假而大其權位則邪說狂煽必率天下而爲無父無君之行臣誠不知其置

皇上於何地也康有爲進而梁啟超之徒皆相繼而進矣梁啟超在康有爲之門號曰越賜聞尙有超回等名亦思駕孔門而上之蓋康有爲以孔子爲自作之聖而六經皆託古梁啟超以康有爲爲自創之聖而六經待新編其事果行則康氏之學將束縛天下而一之是真以孔子爲摩西而康有爲爲耶蘇也如此邪妄之人能爲

皇上用乎

皇上不用則開會聚黨以鼓其邪說

皇上用之則惟希合以堅

皇上之心其實亦將

皇上爲孔子而假公行私假權行教風示天下也若遂其所爲則必以計退大臣以法散羣臣期年二三月之間

皇上左右前後罔非其私黨也此可以臆決而得也且縱不叛逆而王安石呂惠卿蔡京章惇之覆轍必復見於今日臣誠不知以

祖

宗締造之艱何必急急以取便於小人之私而喪之臣以爲

皇上誠欲變法必求忠直清毅之臣庶幾如范仲淹之比而後足以致治康有爲梁啟超乃舞文誣聖聚眾行邪假權行教之人臣

謂

皇上當斬康有爲梁啟超以塞邪慝之門而後天下人心自靖

國家自安否則恐天下之禍不在夷狄而在奸黨也此臣所謂去邪慝也其三曰留正學我

國家之有學五帝三王之所貽

列聖之所植也伏讀開設學堂

聖諭謂當以中國聖賢之學爲根本大哉

皇上之心一

列聖之心也其在道光時唐鑑倡學

京師而倭仁曾國藩何桂珍之徒相從講學歷有年所羅澤南與其弟子王鑫李續宜亦講學窮廬孜孜不倦其後內之贊機務外之握兵柄遂以轉移天下至今稱之則不可謂非正學之效也然今立大學堂於

京師而自直省府縣以下則改書院爲之不知其改書院有以異乎將改之而學者遂大進乎臣謂學堂之與書院猶多之與夥少之與鮮名殊而實一也夫果徵實事何必盡改學堂如仍屬虛名何必盡廢書院若此者臣亦知其故矣書院不廢學堂不行不足以標異新政且非移耳目恐不能以西學鼓簧天下也臣愚以

爲今天下之患莫大於以西學亂聖人之道墮忠孝之常經趨功利之小得駸駸乎爲西人導其先路而率中國以迎之此臣所尤夙夜忧心者也然此輩輒敢大言儼然自以爲識時務之傑也君子不齒則雜取老墨釋耶之支說非堯舜薄湯武陋周孔肆其雄談以驚庸眾臣又於古求之古之人未有不通時務而可以爲學者漢之諸葛亮未嘗一出隆中唐之李泌未嘗親學方技然而深明天下興亡之故運籌決勝厥功爛焉亦未聞以時務名也時務者亦吾學應有之義非異事也今論西學之要亦止謂通西人語言文字諸藝術然後能刺取其陰事奪其利權而制之臣謂通西學者必其人心術端慤學問通達而又氣吞四夷才兼文武則庶乎其能收語言文字藝術之用也然卽有其人矣或其人口齒鈍澀而不能習方言旣不能通其語言則不必能識其文字斷斷然

也百工之事則孟子所謂一人不能備者也夫通人不能學則必使無學之人學之無學之人彼習其語言未必能通其文字也卽能通其文字彼必不能深悉其機宜中其要害亦猶之不學也况其心術又未必端可以達夷情於中國者卽可以輸中國之情於夷狄者也凡今之人稍學夷言卽居奇貨

朝廷亦破例而授之官然而出使則畏葸怯懦不能持正論以存國體居官則猥瑣苟賤惟知順夷意以凌我民臣未見其有益於國家也而藝術諸事學之多年亦未有名者且夫振

國威懾敵氣謂西學之善可也捐土地償貲財屈意乞憐而謂西學之善則孰不可以爲善也使言西學而可以激發其天良敦勉於實事謂西學之善可也辯言亂政牟利求寵且益天良漸滅臣未知其所以爲善也是故近日以來士大夫汲汲於利祿而無廉

元書 卷百一十  
十  
恥父子兄弟斷斷於貨財而無倫紀蓋中國早已爲夷狄而後夷狄乘之此雖大聲疾呼亟語以聖人之道恐亦褻耳而無聞况朝廷又導以異學幾何而不胥折而入於夷也故凡趨重於西學者則其人可以華可以夷者也可以華可以夷誠恐天下之民非皇上有也然而

上諭固曰以聖賢之學爲根本而彼不從者何也天下亦曰此皇上之令也非

皇上之意也此其所以趨重也故抱修明正學之意則臣下自相講求而振起有餘鼓趨重異學之風雖

聖諭以培根本而挽回不足臣謂修明正學則凡時務各端可以括舉而無遺諸葛亮李泌唐鑑倭仁曾國藩之屬是也趨重異學則舍本而圖末徇人而失己康有爲梁啟超之徒是也學問之故

消息至微關係甚鉅不可不察也此臣所謂留正學也其四曰擇將帥今外夷之索地索賄而我不能拒者由兵弱也兵弱則我一切制治之術外夷皆得而持之而不能行其意此制治莫急於兵也然今議裁額兵而行團練漸學西人民兵之制以臣計之東征之役臣嘗學習行間凡日人之所以勝而我軍之所以奔者非兵果不足用也未嘗見敵已先逃潰而又掠取百姓滿橐而歸此誰之咎也今陝西撫臣魏光燾安徽道員李光久猝然遇敵雖力不能支然奮勇搏戰日亦傷亡多人此非兵不足用之明驗也臣觀外國用兵亦與中國古法無異其要在謀定後戰日人所以勝者窺中國厭兵故也此其謀勝矣故能聲東擊西不過以二萬人橫行海上倏而登萊倏而遼瀋倏而攻海軍倏而攻陸隊且兵法所尚仁勇嚴廉信五者彼皆有之而我軍則不知地形不明兵略

兵多而無扼守之地將多而無調度之人進則未有出奇犄角之師退則未有游擊援應之隊譬如圍棋滿布行閒無非死著而已而貪而復懦而驕則又大異於敵人此其所以不能戰也由是觀之外國可耀其兵與器而反恃奇謀中國自薄其兵與器而反欲浪戰此其優劣固已殊矣故不明勝敗之由而曰兵不可用必改而爲民兵臣謂此亦標異新政以爲效法西人其實則以無財而欲取之於民又以欺

皇上以爲能治兵也夫兵凶戰危必勇悍不畏死之人而後可以出入鋒鏑非任人而可以爲兵也故召募者數代之良法也曾國藩名爲團練其實則召募也胡林翼則始終不欲行團練蓋以此也如欲行民兵

皇上下其事於督撫督撫下其事於守令守令下其事於鄉紳鄉

紳計無所出乃與長官建議空冊一上事已訖矣近日州縣保甲諸冊往往皆然此猶不擾民者也若夫守令旣不知兵而又好事喜功鄉紳之賢者知其不能而不之從也而桀黠之徒乘之以入於是兵則案戶抽丁餉則案畝加賦又以賄賂出入其軍籍擇肥而噬擇弱而攫守令欲其成軍而佐其威督撫亦欲其成軍而壯其氣彼又以此快意恩怨官紳狼狽良民疾苦壅不上聞中國諸無足恃所恃者獨民心耳

本朝深仁厚澤二百餘年恐自此而民不聊生矣且內旣擾閭閻而外又不足以應徵調徵調令下必至逃亡是一旦有事而天下並無一兵也民兵之弊如此而曰效西人之制如非誤國必有別謀矣臣又竊見戶部左侍郎張蔭桓保舉將才皆由廢籍廢籍固未必無良將然何其多也凡國之強不在兵而在將英之強空林



鄧訥爾遜也德之強畢士馬克毛奇也非徒民兵之長也亦非徒羣將之力也不師其人而師其制臣愚謂以今之人而使將兵雖子以德之陸軍英之水師而亦不能與諸國爭雄海上東征之役可見也其能用民兵乎是故優游承平之時雖中人之材可以寡過宏濟艱難之會非非常之傑不能有成

皇上誠欲強兵其必求非常之傑明矣此臣所謂擇將帥也其五日慎財用天下猶一身也土地猶骨肉也貨財猶精血也未有一身而可以無骨肉未有骨肉而可以無精血者也近自軍需頻起又重以日人兵費先期逼索昨又江南大飢山東河決蓋天下凋敝未有甚於此時者也臣嘗攷

開國之初地狹人稀又連年用兵而

國日富咸同以後削平大難歲入愈多而愈貧困是何也自李鴻

章主張西法西人奪小民之利而

朝廷又竭天下以供夷狄西人知中國之不足於財也而侮之中國又自知其無財而畏之於是反給之財以求訖事又仿效其法以匱己財是展轉自窮之術也府庫既空乃發天下之藏而招信股票行焉股票之行

皇上屢下明詔不許抑勒也然而誰非苛征即經嚴旨詰問而大吏皆爲州縣飾辭以脫罪何也蓋

皇上以利示人天下不敢不以利應不敢不以利應則不能不厚取於民而

皇上亦自不能深問此事之固然者也今幸奉

詔停止天下之福也然搜括已半載矣搜括以償兵費猶之股精血以肥盜賊况又搜括而未必償兵費臣未知

元書 卷百二十一  
國債日益日深將來更何術以籌之臣獨怪近時計臣之策以爲度支不給於是裁官裁兵裁行省諸局獨至步趨西法無不立予重賞今西法之行者曰鐵路曰礦務曰製造昨又農工商務局開矣美其名不曰收回利權也則曰廣殖民生也然臣但見其耗財未見其生財也以爲久而後成歟則津海鐵路開平煤礦行已久矣何以不聞其利

國也今裁官而凡微員無力改官裁局而凡文武諸僚皆不自給揆諸王道豈外人情苟其並無過失豈可一旦除名便同罪籍且朝廷旣不體恤下情則天下豈無缺望而計臣則以爲爲

國家治事今省財若干成效大著若是功歸臣下怨歸

朝廷書曰一能勝子言怨之不可不懼也孟子曰匹夫匹婦不被堯舜之澤若推而納之溝中言澤之不可以已也且若以不賢而

去之天下孰不仰

皇上之明若以省費而去之則天下必有望於

皇上之惠然臣猶以爲此不足惜也

朝廷苟移東而補西亦是失此而得彼今天下急務宜若如治兵而

朝廷尙欲練民兵意將爲省官餉之地則天下更有何事須資挹注哉蓋凡可以爲計者無不挈而去之而攷其所用無非以供步趨西法填無厭之谿壑而已此皆李鴻章之成事也李鴻章行之不效而退之而仍用李鴻章之法且又從而增飾之是何異譏人之急而已疾行也臣每觀督撫大吏在未名新政之先凡講西法無不虧空

朝廷惟以爲能寬而不問况標以新政之名限令必行乎天旣不

元書 卷百二十一  
隕地既不生而反傾帑以求富富未可致而債已盈於是上下互

罔而俱不言臣謂既行新政當悉其弊何以愈張之也而

朝廷無名不急之費亦所不免既失骨肉又亡精血存能久乎臣  
恐後此雖有邪慝議行暴斂而亦無所得也此臣所謂慎財用也  
抑臣尤有言者

皇上之用心誠苦矣

皇上之勵精圖治上以安

宗廟下以康元元其誠悃亦竭矣然而臣度

皇上必聞邪慝之人以爲彼得明治之所以興皆奮然改制而不  
顧是以

皇上決意信之而不疑臣亦不謂成法之不可以變也凡變之而  
足以守土地禦夷狄保人民則變之凡變之而不足以守土地禦

夷狄保人民而益足以亂人心壞風俗毆民以從夷則何如其勿  
變也抑臣之所謂不可變者亦非徒株守而止也

皇上必得其人而與之言學則自足以知四國之政教而握其本  
與之言兵則自足以知彼此之短長而運其謀與之言財則自足  
以通中外之盈虛而操其算蓋宏綱不變者也其細事必歷試而  
後行曾國藩水陸之兵制行之數年而後定食貨之釐金亦久之  
而後成也此皆無須

朝廷爲之定制者也

皇上苟求如范仲淹而以之掌樞機求如胡瑗而以之知學校求  
如李靖而以之領兵戎求如劉晏而以之主度支彼其人當自能  
修改至當條理秩序皆可以不煩

聖慮者也其迂謬之經生妄誕之文人希合

皇上以圖富貴皆非能忠於

國家者也未有不忠而可以信者也且夫彼得明治之時非有敵人入其室廬而其之也非有國人習於夷狄而通之也外無盤踞之敵內無勾結之奸而又自造草昧是以毅然爲之而足以強今則山海之險敵已深入矣傳習耶蘇始猶愚民近則士大夫爲之而且豔之又以聖人之經附會之其欲越大閑亟矣效忠於皇上者力爭之亦恃

皇上洞悉其情僞耳此真觀之時所宜以盥孚之者也

皇上若堅意改法則彼前者唱于後者和喁皆其爲夷狄爪牙耳目者也

皇上不過曰吾今取其長以成吾法以固吾圉然天下之人安知深意稍窺疑似則曰

皇上亦崇西法矣由是內之而奸宄肆志以誘良民外之而寇盜恃

命以誘我族類通力合作以遂其私舍此將士無進身之階農無安畝之地工商無營生之途則是天下之民不從奸宄不足以保其家室也則是夷狄不血刃而可以圖我中國也究其極致則奸黨自亂而夷狄收其利此其所以與彼得明治異也自古以來奸黨賺其富貴而國家受其患難比比然也蓋天下必無以此言告我

皇上者也

皇上知其然也必至深恨之而嚴懲之者也然臣又知奸黨必爲西教力爭以爲西人非無倫類雖臣亦知西人非無倫類也倫類天也西人不能無天也蓋西人政自政教自教也西人本不從西

教而專竊以傾人國此其所以爲譎也奸黨亦非不之悟而多方爲之文飾此其尤不可問者也臣謂

皇上之治天下毋徒求之於迹象也亦人心學術吏治兵政一以貫之而已嘉木未有不精液充溢而可以自支及葉者也人生未有不血脈貫通而可以由臂及指者也今內無重臣而

皇上之勢孤外無重兵而天下之局散特科行而或出他途制藝廢而仍取剿說資格破而專引異學之流甄別嚴而大起廢員之列汰冗員而倖位猶固其寵剛繁例而蠹胥得安其身科舉非不變而捐輸可以得仕言路非不開而諫臣不敢盡辭官報臚陳四方之事而不見眉睫之間召見下逮疏賤之臣而半皆私佞之黨重農課桑前代之善政今皆不免爲虛名通商惠工先王之良法今則資之爲利數微官薄祿均養身家而宗室之繁不使自贍海

滋山阿以同世僕而滿漢之見不無少歧名與實不相一也令與意不相一也是故法行於貴近然後人服

皇上之公識燭乎忠奸然後人服

皇上之明機妙於轉圜然後人服

皇上之斷蓋漢高趣銷印此其所以興也宋神宗終遂過此其所以替也伏惟

皇上思

祖

宗之艱難知

天命之不易毋以人言爲可聽而必察其所因毋以

國事爲易謀而必謹其所發毋以爭論之釁爲逆志此汲黯之所以效忠毋以奉行之速爲賢能此蔡京之所以致亂至於天變不

足畏人言不足信祖宗不足法尤王安石悖謬之言得罪萬世當亦

皇上所痛絕者也蓋沈溺已深之人心非法制所可變而積重難返之錮習亦非嚴威所能回何則彌谷皆千尋之木非有風焉而能以力動者未之有也故羣謀並進而必辨其是非百爲並謀而必權其緩急上下相承而必求其無欺遠近相維而必思其相應必使人有可遵之大道而後不至違正以趨邪必使人自發其忠孝之心而後天下咸樂爲之效死夫如是何事不集何功不成此則臣所謂機緘關鍵也自堯舜以來未之有易也至於政化之神亦臣之所不得而言也惟臣草茅愚賤昧死上言以皇上之神明或赦不誅康有爲梁啟超必有以中傷臣而置臣於理矣然臣亦不懼也臣非不知巧爲迎合足以上說

聖意倖邀

國恩然時艱至此

君父備極憂勤而臣子通同欺罔鬼神有知其鑒之矣且邪說四布聖學將微人心將絕

祖

宗養士二百年尤臣所當效死延人心以延

國脈

皇上又

詔許言事無有忌諱此尤不容已於言也干犯

宸嚴無所逃罪倘蒙採擇施行死則臣之分也疏既奏黨人譚嗣同之屬方居軍機用事將坐以毀謗新政當斬德宗蹙然不許曰朕方求言乃以言罪人乎明日嗣同復請刑

上卒格不下廉始得全益有志報

國頃之以貲入爲國子助教會會典久修未得竣總裁因召廉入圖畫處詳其郡縣山川舉其綱目歲餘書成遂保薦爲知府鹽運使銜明年而中外大闕矣津沽旣失督師李秉衡奏廉以爲記室秉衡尋殉國廉溺不死走歸

京師

天子方西巡關中廉乃徒步短衣踉蹌以行甫入關廉思吾楚昭王故事欲

天子卽遷都秦而改紀其政痛申結之無人也遂復上書不報而會是時秦晉正大飢赤野千里道殣相望

天子雖蒙塵然念切民依卽籌金二百萬以蘇羣孳復

詔江南湖北督撫糴米輸西安戶部備運費而賑務大臣辭允升

乃奏以廉察賑渭南北廉因匹馬冒風雪無深谷不入明年至高門太史公先世之冢巍然故存其南韓原少梁也因慨然於秦晉往事欲依司馬氏之遺宅終老焉乃作韓原賦以見志其辭曰歲開春之始月余馳車於韓原左少梁之鬱鬱右高門之緜緜槐子黃以盈樹麥萎茶而將薦惟我

皇之嘉惠實下徹乎淵泉轉粟米於揭砵出金錢於播遷哀吾民之菜色懼

皇仁之不被紛飢病之在牀已日中而門閉呼婦子以徐出羌糗水之久匱悵死者之不生庶存者其尙繼更北陌與南村望屋上之炊煙幸今病之少甦傷古人其不延何亾國之不魚爛豈獨梁而爲然郭開用而牧戮靳尙寵而儀全信陵死而亡魏望諸去而凋燕吾獨不知天誠何心惟鶉首之必棄得陳寶而成霸賜鈞天

元書 卷百二下  
而兆帝既三去而獲狐亦溝宮而遂計彼馬酒之小德獲豐報於華岱雖多城而無人豈強鄰之能艾遷九鼎於咸陽何仁暴之竟背嘆人事之錯迕循作者以盤桓撫太史之先墳問故村其尙完後梁山之崔巍前黃河之瀾漫雖荒後之凋敝仍川原之回環固買山而可笑亦賃宅而非難鴻寄廡而旋死福卒門而不還託龍門之舊素用潛心以閉關

岳

劉鴻績

刊

門人曾 緇襄校

門人曾士琮詳校

元書卷百二上

元書卷百二下

邵陽曾廉撰

自序第七十七下

然竟不果而湖北巡撫端方以山西潰軍劫掠奉

詔推問又奏廉從行廉因議曰兵不善戰而善掠此兵所以不可用也宜論如法主兵者將爲其列校道地而無從也遂潛聞於上改令械其將赴刑部於是廉復西歸

行在其月廉以知府分發陝西遂蒙

召見廉是時知國空虛造次不能以辭自達乃悵然太息於板蕩之將復作也尋以察賑之勞遷陝西道員省復檄提調賑務欲以要其終未卒歲

車駕迴鑾竟中忌有

元書

卷百二下自序下



詔黜罷廉因思竄伏遐荒西南至黎平錦屏卜宅以居乃作廬沅  
賦曰嗟予生之蹇產兮意忽忽而不甯謂生我之後時兮說正貞  
乎武丁何少縱而卽逝兮早松桂之凋零歲敦牂而秣馬兮從雲  
旗以東征魏武之指柳城兮田疇導其先路士燮之釋楚兮夫安  
必其內懼宙合之生死兮眈眈乎在此舉也天祁祁以興雲兮何  
九載之淫雨也懷恩之固寵兮藩鎮遂以亡唐曰宋仁之緩弱兮  
啟堯舜以管商已示弱而爲強兮宜天下之蹶也孫不察人之衷  
情兮孰從革而不折也乾坤旣以易位兮奈何信其瞽說贊萊之  
盈室兮納中行之詭譎眾齎怒而憤盈兮紛冰炭其交切茂公孫  
其內訌兮固天弧之已弛唐皇之出狩兮夫孰促以致此余從人  
於畿甸兮羌自沈而不死鬱卞壺之忠烈兮誓隕身以明恥軍罔  
罔以潰亡兮挺自都而西趾夜藝薪以煖骨兮秋露淒其早寒慙

覩覩以就生兮焉知衣之爲單余朝乞食於殘卒兮暮宿乎山之  
阿莽蜀黍之垂垂兮羌枕土以爲戈夜耿耿以數起兮見織女之  
斜河超易水之虛梁兮又問渡於滹沱荆軻吁其已往兮王霸誑  
而非訛惟周漢之中興兮天明明而司之非方召之壯猷兮天固  
不可知也旣同舟以共濟兮非帆楫其何支也牽牛之不以服箱  
兮南有箕而不可以簸揚高邱之有賢女兮亦何畏乎鬼方紆紫  
綬之若若兮宜天威之重揚紛羸馬之戀棧兮見芻豆而倉皇彼  
全家而保金玉兮又安知國之存亡易子西之改紀兮仍秦人之  
徙木苟采薇其曰歸兮將兵食之頓足也變學子與師徒兮曰車  
攻其立矚也不識時而違眾兮謂遷都之爲良西未央之遺趾兮  
面終南之蒼蒼棄天府之雄圖兮終將占乎括囊察周穆之東還  
兮晨北濟乎汴梁惟光復之盛勛兮惡異己而言長苟余情其信

質以固兮雖屏棄亦何傷風飄飄而卽路兮懷吾孫之馨香雲福  
而言大兮何王鈇之不礪保首領以飲啄兮實九天之嘉惠汨汨  
舟於鹿門兮訪龐公之舊廬灘雷碾以夜號兮煙樹碧以扶疏超  
長湖以入荆楚兮任徜徉以夷猶登高樓以四望兮見昭邱之幽  
幽彼屠羊之微業兮羊寢訛而在顧甘心以困赤紱兮非賈胡之  
故也蘭蕙之爲茅兮非蓬蓀之怒也鬱天地之茫茫兮渺不知託  
足之所居思桃源之中人兮歎問津之不可再指椒嶺以爲程兮  
欲溷跡於徭人古寺之荒涼兮輻巡檐而日昏宵漫漫其不可曉  
兮拚梵宇以棲魂人事之見迫兮更南徙乎蠻髦仰玉山之巘巘  
兮指沅水之滔滔數寄軀於空王兮見我生之所遭佔畢之餘暇  
兮弔國殤之荒祠蕪漫其不可以示人兮語鄉人而新之曰袁紹  
生而漸滅兮臧洪死而瑰奇龔騰安之若素兮柳璨臨戮而知其

宜苟天地之不做兮知雄鬼之必依烜忠愛之不泯兮焉問其死  
生也世汶汶而莫我處兮惟山鬼之清也余旣生沅水之分野兮  
徐相地於梅屏羌植籬而築室兮借典籍以娛情前城郭之藹藹  
兮後岡嶺之縱橫三溪合而西流兮田疇陞而稍平繞吾廬以微  
流兮橋上下以通堂茅亭之覆橋兮宜早暮以乘涼豫章之當門  
兮竹陰陰以環廊梨花之慘白兮乃掩蔽乎西箱栗葉之蔭屋兮  
夏大綠而秋黃樹紫竹之屏兮別內外而引清風於牡丹之臺兮  
花矜貴而自雄西嘉蔬之圃兮東挑菜之渚也日灌溉以往鬻兮  
暮得酒而起舞日月忽其不淹兮思美人於銀潢曼芙蓉之綽約  
兮恐白露之爲霜登前山以延首兮望隋唐之遺隍目紆遠而不  
見兮淚沾襟以浪浪天夢夢以高臨兮曾不知岱之爲邱跖甘人  
而辱孔兮石穢行而稱周舜淪於蒼梧之野兮堯見困於幽囚孰

元書 卷百二十一 三  
有心而可忍兮獨安居於荒陬亂曰山谷深邃繁卉木兮采藥南  
行以自贖兮非蒸之故胡不寐兮眾芳既歇艾爲佩兮白日須臾  
決羸葬兮山有三秀其往訪兮尹不生桑人道不喪兮蒼蒼者天  
深不可料兮嗟爾小草焉必天之照兮廉以爲人世蜉蝣宜優游  
而已也乃作掘閱園記曰澄濱野人求曹氏地於錦屏鄉梅屏之  
麓規以爲園將成周回審視而歎息曰嗟乎此乃蜉蝣之居也於  
是名之以掘閱客有過者進而問曰先生不遠千里來宅其欲歌  
哭聚族於斯歟抑以此爲天地之旅舍也不然其何以稱焉野人  
笑而應曰客未滿乎蜉蝣歟吾尙恐吾侈言之而不足以其厭其  
實也在昔曹風之詩曰蜉蝣掘閱麻衣如雪心之憂矣於我歸說  
掘閱云者言其掘地自容閱也詩人見曹人之修飾邊幅而鮮訐  
謨以爲其衣服采采而楚楚直蜉蝣羽翼耳而我何所處息是我

亦蜉蝣也然而猶未至於極也又進而危言之曰蜉蝣旦暮耳其  
尙有地可容也如彼麻衣憲憲自喜宇宙之大將何地以容我乎  
見其竝不得比於蜉蝣也嗚呼是何其言之激而憂之深也歟而  
我乃獲有此園也是固詩人之所羨而不可得者也此其所以名  
吾園歟且夫天地之生物也羽之屬鷦鷯則戾天而飛者也鱗之  
屬鱸鮪則逃淵而潛者也獸之屬虎兕則率野而奔者也蝨蟲之  
屬蜉蝣則掘地而閱者也惟至誠爲能盡其性以盡人之性盡人  
之性以盡物之性天也淵也野也地也此盡萬物之性者也民康  
物阜而後天地清明故天地位焉萬物育焉此中和之致也及其  
敝也上下無紀陰陽紊序風雲鬱闕萬物失所孔子見詩亡而作  
春秋春秋有婉有直皆取諸詩風詩之婉而有直者也雅詩之直  
而少婉者也婉者柔而毅直者怨而哀婉者俾諷誦而自得之直

者使聞之足以戒也故其時正月繁霜念我無祿則爲之詩曰瞻  
烏爰止于誰之屋道烏之靡所止以興人之靡所從祿也棄輔輪  
載搜括及於窮僻故又曰魚在於沼亦靡克樂道魚之潛伏於沼  
而不得樂以興人之潛伏於山澤而不得安也若夫毛裏之恩薄  
憂周道爲茂草則爲之詩曰弁彼鸞斯歸飛提提道鸞之有所歸  
飛以興己之如周流而不知所居也草黃人矜征役不已則爲之  
詩曰匪兕匪虎率彼曠野道虎兕之有所率以興己之困於棧車  
而不得息也四氣如環草木瘵廢人民愁困則爲之詩曰匪鷄匪  
鳶翰飛戾天匪鱣匪鮪潛逃于淵道魚鳥之有所逃戾以興己之  
非魚鳥而不得至天與淵也玩水而溺滅將及頂而泄泄者方用  
憂謔則爲之詩曰蜉蝣掘閱道蜉蝣之可閱以興己之不如蜉蝣  
而無葬身之地也嗚呼人至不如蜉蝣而欲天地定位得乎是故

大亂橫生三綱淪而九法斃當是時惟麻衣赤芾始足以與聞天  
下事也而彼所爲纒綖鞬闔何一而非思保其爲麻衣赤芾者也  
至於以國爲市以人爲糧如彼七雄六代五季天之降禍未有如  
此之酷者也蓋天理滅人心死天澤移易玉石混淆而天地或幾  
乎閉矣雖然伊古以來醉生而夢死者方且采采楚楚彼皆自謂  
千秋萬祀澤施子孫其智力固出人萬萬也我生不辰云徂何往  
此詩人所憂其不如蜉蝣也丁天地之瀕洞噴沓背憎朋友以譖  
不言而疑不動而謗剖心泣血而不足以輸其忱也懷沙枕淵而  
不足以喻其志也昊天泰憮謂之何哉於斯之時視天夢夢尙寐  
無覺此君子所願自處於蜉蝣也自謂其不蜉蝣而以致天下於  
不如蜉蝣人斯憂之矣自處於蜉蝣則必有不蜉蝣之心以行其  
不蜉蝣之業而後可以蜉蝣也可以蜉蝣者斯其可隨地而閱者

也雖然蜉蝣之大也蜉蝣之難也蜉蝣乎其諸龍德而時舍者乎  
其諸進退存亡而不失其正者乎是故君子之所不蜉蝣者則有  
之矣富有之謂大業日新之謂盛德故曰萬物皆備於我矣乃若  
其所蜉蝣者舜禹之有天下也而不與焉伊尹之干駟厚祿弗顧  
也孔子曰不義而富且貴於我如浮雲此之謂也故曰余恐侈言  
而不足以厭其實也客曰若然則天地非蜉蝣歟而何有於園歟  
而何況於子歟野人曰客何以蜉蝣天地爲哉昔者庖犧氏以降  
聖哲代生爲之君爲之師暨三事四科皆盡其性以盡人之性盡  
人之性以盡物之性者也盡物性則贊化育贊化育則參天地天  
地與聖人同其功也充聖人之心終古無麻衣可也其有麻衣者  
天地不與聖人同其憂也天地之大也是故以天地爲蜉蝣者其  
將廢聖棄智薄仁蔑義竝大小齊彭殤者也莊周之徒也以生人

爲非蜉蝣者乃貪勢固位皐皐訛訛難退易進者也子叔疑之徒  
也君子惟知其爲蜉蝣故俛焉日有孳孳斃而後已惟懼其爲蜉  
蝣故疾沒世而名不稱焉惟度其不如蜉蝣故且以喜樂且以永  
日獨寐寤歌而弗過也是故廣大而幽渺彊毅而恂慄光明而沈  
晦篤實而虛閒方正而圓融縝密而曠達毀譽聽時人死生聽造  
物是非聽萬世以存其蕭然蜉蝣之心木石之與處鹿豕之與游  
猿狖之與鄰泉壤之與養早作而夜思春種而秋穫耕田鑿井而  
悅詩書疏食飲水而勉禮讓巢棲穴處而不絕乎人世吟風弄月  
冥然而與泉石煙雲卉木爲一以寄其蕭然蜉蝣之身且夫君子  
非不知天之靳與人以康樂猶愈乎其靳人以富貴也以爲苟僥  
倖於日暮之間冉冉焉庶幾其掘地而鬪也然固詩人之所羨而  
不可得者也若夫天之方憊眾人競競君子几几其諸不以福而

豫不以禍而戚不以生而存不以死而亡者歟是故湯文之囚周公之辟孔子之微服原之放誼之遷遷之刑愈之竄贖之死蘇黃之瘴癘程朱之遠荒彼何所閱而自無可爲憂者也其次梅福卒門梁鴻賃春李恂織席范冉拾麥申屠備漆鄭元假田趙岐賣餅枋得賣卜彼莫不燎焉燭宇宙皇焉震古今而不繫乎其閱之有無也是故其有是園也逆旅而園也其無是園也園而逆旅也園主而我賓也是園之息我也我主而園賓也是我之大園也雖然天地野淵物之性也廬室牀几人之性也人之踽踽涼涼性也人之歌哭聚族亦性也是則吾之爲是園也乃所以盡人之性而以解夫詩人之憂者也雖然猶有說焉世之邳治其能盡人性以盡物性者也世變以降人性漓焉而物性未嘗不自若也是故七雄六代五季以來泯泯棼棼靡有遺黎具禍以燼而相彼蜉蝣未有

無地以自處者也是故一以爲詩人則無所歸說一以爲蜉蝣則掘以自閱而今而後天下之人其求我於糞土之壤蟲鼠之間吾地吾掘不知其憂吾掘吾閱不知其外是則吾之名園其又君子之所不以爲侈者歟客然而退遂扁之竝記其說於壁又作有樞草堂記曰余旣作掘閱園乃爲草堂於園而名之有樞曰嗚呼古之人蓋未有不志其死生而可以挺挺自立者也而唐風有樞之詩獨流連於車馬衣服鐘鼓琴瑟廷內酒食之屬若甚有所悽戀於死不死之際惴惴焉憂他人之伺其側則豈非天下之恡人哉而孔子存其詩不之刪何也且夫人於崇高之勢嬌妻稚子宛轉之權不可恡而猶有可恡之情焉至於死則斷未有能恡者也則富貴佳麗亦未有能恡者也日往則月來寒往則暑來生則必死焉往則必來焉生之與死其亦猶寒暑日月也我之於他人亦猶

昔人之於我也唐自帝堯以來至於叔虞中更千餘禩纍纍然其爲他人也多矣懼他人之我有而有所恡以爲久豫不知天命者也不能拒他人之我有姑荏苒焉荒淫以死以貽患於子孫尤不知天命者也是二者皆爲己謀則愚爲人謀則戲故知決非聖人之所取也嗚呼唐之人蓋有大不得已者也當是時國之偏甚矣唐侯失勢幽憂味不知甘苦聲不知樛窳不知天地南北不知日月之有明晦灰心喪志束手待盡唐之人亦知其不足復有爲也智無以爲謀忠無以爲效乃相與寬而慰之惟冀幸於一日唐侯之不死他人一日之未入室盤樂飲酒驅騁田獵歌舞宵晝極須臾之意以抒萬古無涯之憤嗚呼何其悲也夫唐之人其有大不得已如此今余以流離滓賤之身蓬蒿圭華之爲廷內齋植草糗雜糠粃以爲酒食出無車馬入無橈筥春秋之日鐘鼓蟲鳥琴瑟

溪澗是吾樂也倦而歸寢則雞棲之室傾欹於漏天瘴霧之間猿狄登其楹蚯蚓緣其榻卽不死而揖讓以延人之入人亦將笑而莫有應者也亦何取乎有樞蓋且以喜樂且以永日亦古人斷章之義焉生旣無所營死亦無所恡以是成爲蜉蝣而已雖然以爲吾幸無唐人之所有而始無憂乎他人之入室乎今夫唐之人而果能有其車馬鐘鼓乎則所謂他人者乃其爲我藩籬而世世守之者也聖人之所樹也王者之所任也而後知唐人之憂非以其有也吾之不憂非以其無也居數歲榮惑入南斗逾數旬廉因歎曰天象變矣而人事未有以回天者也昔在麓山欲有所著述而病其言非大事也黃岱鍾言元史最名蕪漫子能刪訂之成一家之言可謂名山之業矣顧無其暇未敢執筆然自是遂留心和林之舊趾三河之故蹟西北之荒陲東南之島嶼辨別於土地人名

語言文字之同異徵以元人當代之文而參以異域殊方之論由  
葱嶺以達四海滂沛四下如屋之有極以逮乎宇也瀛海既周則  
勢成破竹攷其時代按其家世次其遺事瞭如也悠悠忽忽日月  
其邁今匿跡荒山閉門十日無剝啄聲其可以竟緒乎且吾先人  
前仕於元文采風節宜有可稱而史無傳焉余小子纘而述之雖  
不敢以家乘補國史而英賢沈沒古亦有之爲人子孫未有不盡  
然傷心者也夫一代之始終治亂興衰豈苟而已哉掇而萃之亦  
當時得失之林也於是補其遺落芟其重贅自朔方始至北狩止  
自唐中葉變起河朔啟遼及金以逮於元遂一天下述太祖本紀  
第一  
下兵唐鄧會師汴梁終太祖之志宜爲太宗不毀之廟述太宗本  
紀第二

定宗之志西清月蝟傷無年而召謗述定宗本紀第三

國無定章能行法度以約紛散述憲宗本紀第四

武足以靖亂文足以綏邦既定江南頗熒聚斂而知崇儒術述世  
祖本紀第五

守成不易而累於疾厥有賢輔承世祖之緒述成宗本紀第六

懷甯捍邊鐵衣十載及踐祚之年而憊於雙斧述武宗本紀第七  
懷州入臨以靖內難則友有焉周王出藩遂滋後患述仁宗本紀

第八

惟獻惟聰兼有良輔南坡之禍乃女戎之故述英宗本紀第九

晉王宗子履位不疚而誣者謂與陰謀述泰定帝本紀第十

天高高地自下日月出燭火滅天順正位天秣竊述天順帝本紀  
第十一

元書

卷百二十一 自序下

九



主少國疑支子覬焉長幼所限而降爲皇儲述文宗前紀第十二  
讓國實難以虛名而受實禍明宗有焉述明宗本紀第十三  
內慚其兄而陽愛其子惟地之震非地弗甯天人厭之述文宗本  
紀甯宗本紀第十四

戡黎之訓曰惟淫戲而察其心迹無虐於民述順帝本紀第十五  
秣象之學莫善於元錫名授時實惟欽若述秣象志第一  
禮曰地員惟地配天惟元幅員什百九有述寰宇志第二  
昔神禹是作河渠惟水利害與民生死述河渠志第三  
國禮猶存何有於古亦循舊章冠裳干羽述禮樂志第四  
國之大事莫過郊廟祠及非神曰祈福社述郊祀志第五  
用賢無方國是以興嗚呼一天而分畛域述選舉志第六  
元省院臺比漢三公旁招俊乂列於庶位述職官志第七

六藝既興七略繇出代有其人富於撰述述藝文志第八  
非食不生非貨不通陽則用錢陰則用楮以濟天下述食貨志第  
九

惟刑之大其名曰兵惟訟惟師是起飲食述兵刑志第十

興爲締綌衰休蠶織宣懿攸殊以武力顯元獻不德禍及累葉後  
王淫巧遂隕厥世述后妃列傳第一

太王之昭王季之穆其上無聞世本末錄昔者金源實詳皇族元  
不通姻天潢是篤述始祖以來諸族列傳第二

三河之源眈眈虎視不有廢也君何以興述塔塔兒泰赤烏札荅  
刺克烈蔑里乞乃蠻乞里吉思列傳第三

中原無主逐鹿於野天命有歸非忠信何存述耶律留哥蒲鮮萬  
奴張鯨石琚李全嚴實列傳第四

哈撒之射別里之力開國之功邁焉合魯早逝幹噴老壽亦翼厥國述烈祖四王列傳第五

赳赳桓桓是斬荆棘爲國虎臣述博爾朮者勒蔑忽必來赤老溫博爾忽朮赤台畏荅兒列傳第六

入參謀議出專征伐以蕩中原世復多賢赫赫闕閱述木華黎列傳第七

渾河之水水一石泥八斗有能飲此功不朽述鎮海札八兒耶律阿哈耶律禿花阿朮魯列傳第八

壯哉兩先鋒寶玉繼之遂橫軼西北札刺忒木竝號忠勤述哲別速不台郭寶玉札刺兒帶忒木台列傳第九

天倪天應之敗以拒人言俊亦終殞述史天倪董俊石天應列傳第十

始爲裨將稍擅方面開國之運遂大其世述吾也兒移刺涅兒石抹也先槃直膺魯華王珣何實李守賢列傳第十一

童穉克敏免冒之子卒爲好佚述忽都忽察罕按竺邇劉敏第十二

明安定中都伯林定西京黑馬重山天澤鎮中原訖於爰立號稱威重述石抹明安劉伯林粘合重山史天澤列傳第十三

古無王子分藩萬里朮亦察合遂延祀於西海拖雷克友比跡金滕惟天有鑒帝其子孫河間追隨亦賜厥履述太祖四王列傳第十四

張柔復仇世顯戕帥投宋不受始歸於元福源見枉竝大其嗣大淵之降庶幾云已述張柔洪福源汪世顯楊大淵列傳第十五  
以戰以食惠保殘黎力盡撫綏述王義張榮張子良王珍杜豐田

元書 卷百二十一  
雄列傳第十六

太宗之後遂爲昌邑海都用憤大名河平并起和之五十年而始甯述三宗諸王列傳第十七

能知術數而本儒學一室蕭然功在天下述耶律楚材劉秉忠列傳第十八

王檝使宋以不和爲憂而郝經遂有蕭牆之慮述王檝郝經列傳第十九

惟中建祠祀周子儒風以振趙璧能任大事文謙子貞制作以備述楊惟中趙璧張文謙宋子貞列傳第二十

北徽立國惟嗜殺伐以道事君本於至誠元始能國述姚樞許衡竇默列傳第二十一

布魯陳祐惠此中土瞻思立道滇疆是柔北海南海好禮及澤綏

之有餘述布魯海牙陳祐賽典赤瞻思丁張立道劉好禮烏古孫

澤列傳第二十二

西方之學亦本仁義何必絃誦始稱儒者述岳璘帖木兒月合乃

愛僻闊闊秃忽魯也速鐔兒察罕列傳第二十三

希憲剛明商挺佐之世祖以興讒人高張良弼馬亨能明其志述

廉希憲商挺趙良弼馬亨列傳第二十四

慷慨忠誠能出使絕國而不辱君命述速哥月里麻思石天麟鐵

連昔班張庭珍梁曾列傳第二十五

天遣降格爲國先驅而文虎嬉戲棄師竟逸天誅述劉整呂文煥

高達范文虎夏貴列傳第二十六

伯顏雄駿旣平南國復摧叛藩阿朮阿里竝爲熊虎述伯顏阿朮

阿里海牙列傳第二十七

元書 卷百二十一  
三  
紐鄰少傑力定巖疆也速諸人皆邊將才國傑壯烈志膏原野述  
紐鄰也速帶兒也罕的斤愛魯劉國傑管如德列傳第二十八

西荒昧眇淪爲醜虜諸將齟齬各奏膚功述趙阿哥潘李忽蘭吉  
張庭瑞焦德裕鄭鼎速哥劉恩郭昂列傳第二十九

以科第起家而策名異代有拔茅之征而夢炎葉李世祖有議焉  
述高耀智李昶楊果王鶻王磐徐世隆孟攀鱗留夢炎葉李列傳  
第三十

亡國之族白馬之客侯服于周能奮其文謨武略述班都察李惟  
忠趙與芮趙孟頫列傳第三十一

戰於淮西戰於海南有采遺楫日以剪伐無餘述塔出董文炳張  
宏範李庭忙兀台昂吉兒列傳第三十二

元起朔漠而能崇文嶽嶽諸賢藝林之望而秉其直諫以益王家

述楊奐高鳴張孔孫閣復李謙王惲王思廉王構暢師文列傳第

三十三

清者不蔽剛者不撓是爲風憲之臣述雷膺胡祇遼魏初王利用  
姚天福申屠致遠尙文列傳第三十四

正色立朝無欲則剛易於批鱗難於投鼠述張雄飛相威崔斌崔  
或劉宣楊居寬何榮祖程思廉馬紹列傳第三十五

中正不倚宜爲相臣列於侍從未行其志述張德輝李德輝董文  
忠董文用列傳第三十六

張蔡之學寥寥無傳諸賢挺生以測天顯述楊恭懿王恂郭守敬  
齊履謙列傳第三十七

線真親臣而能知人安童和禮困於脆脆徹里不忽皆能伐奸而  
阿魯乃稱全才述線真安童和禮霍孫徹里不忽木阿魯渾撒里

元書

卷百二十一 自序下

三

列傳第三十八

地不滿東南淼淼萬里天所以區夷夏而行師轉漕有力焉述阿刺罕阿塔海張禧峻都來阿八赤史弼高興亦黑迷失羅璧列傳第三十九

昔周立政詳虎賁綴衣摯御多賢繫世祖之聖述許國楨劉哈刺八都魯鐵哥禿堅不花王伯勝列傳第四十

明孝嚮學實惟元良諸弟亦多材武效力行閒述世祖九王列傳第四十一

順德明智死奉懷甯不花脫脫竭力斡旋孟以舊學遂爲甘盤阿忽懷貳乃正典刑述合刺合孫阿忽台阿沙不花康里脫脫李孟列傳第四十二

介冑之士亦有儒者夫惟大雅卓爾不羣述陳天祥何瑋程鉅夫

張珪列傳第四十三

清而不刻平而能直當官而行不侮鰥寡不畏強禦述李秉彝賈居貞張昉袁裕燕公楠干奴吳元珪朵兒赤王都中張昇韓鏞列傳第四十四

惟昔先民芻蕘是詢出其言善千里應之述趙天麟鄭介夫黃如徵列傳第四十五

相臣之體不爲利回涅而不緇是爲純白伯荅尸位亦至台鼎述塔刺海塔思不花乞台普濟劉正郝彬禿忽魯伯荅沙列傳第四十六

文學之臣嫺於政體敦樸厚重而有威棱發言足以折姦制行足以厲世述郝天挺劉敏中王壽王約王結張養灑敬儼曹元用郭貫王毅高昉列傳第四十七

泰定之廷可謂無人而臨事效忠則亦有焉而不克終亦或沈沒  
述旭邁傑倒刺沙荅失帖木兒兀都伯刺月魯帖木兒鐵木哥馬  
札兒台囊加台列傳第四十八

天祿南興蕭鸞之亞諸臣奉之與其機事誣其死君述趙世延張  
思明阿禮海牙孛朮魯拙虞集歐陽元列傳第四十九

諫諍之臣論或至激千人諾諾不如一士述李元禮謝讓脫歡趙  
師魯索咬兒哈迷失曹伯啟宋本秦起宗自當王克敬列傳第五  
十

賀氏忠臣世負其枉惟楊與蕭追跡巷伯拜住脫脫棟隆而凶鳴  
呼殄瘁人之云亡述賀勝楊朵兒只蕭拜住拜住脫脫列傳第五  
十一

知宰相賢否視天下安危福莫大於保信尙賢禍莫大於妨賢病

國庸庸保位非亂世之才述鐵木兒塔識別兒怯不花阿魯圖紐  
的該朵兒只汪家奴伯撒里列傳第五十二

季世台鼎多別肺腸忠而不同宜有以賈禍而良楨賈魯乃頗從  
時議魯卒於師楨亦幾殆述許有壬蓋苗亦憐真班呂思誠朵兒  
直班烏古孫良楨賈魯成遵列傳第五十三

國有讜論其國不亡蝨賊內以墜其緒述王思誠陳思謙崔敬  
歸陽張楨陳祖仁列傳第五十四

科第肇興賢哲斯起惟嶽降神帝生同日諸賢好學竝著清剛述  
張起巖瞻思李好文蘇天爵王守誠李稷貢思泰李士瞻列傳第  
五十五

亡國將帥率驕而懦其有名者牽於大勢亦訖無成功述老章太  
不花荅失八都魯納麟達識帖睦爾顏帖木兒慶童也速列傳

第五十六

文武之臣力圖戰守運移祚履志決身殲述李黼秦不華星吉福壽余闕董搏霄道童石抹宜孫列傳第五十七

草澤英雄忠勇奮發亡國之所倚興王之所服八閩兵威亦能殉國述察罕帖木兒陳友定列傳第五十八

嗚呼衰世皇嗣多故亦越愛猷夕曉佛法述成宗以下諸王列傳第五十九

國之肺腑與國休戚朔漠雄風永爲藩輔述世戚列傳第六十惟西南夷唐宋不賓元復開闢與有漢比烈述段興智阿察楊邦憲田景賢列傳第六十一

西越流沙東越渤海爲國懿親土蕃終亂勞我戈鋌佛法如何盡於財賄述畏吾兒哈刺魯高麗土蕃列傳第六十二

儒者之學首在窮經章句之學大義未宏本末兼賅斯爲儒行述

儒林列傳第六十三

文人無行自古而然聖人之言文質彬彬言之無文行而不遠述

文苑列傳第六十四

仁足以馴暴清足以弭貪非信不威非公不惠知柔知剛是謂眾

母述循吏列傳第六十五

古之高人泥塗軒冕天地既閉道在括囊大命雖傾國以永存述

隱逸列傳第六十六

君臣之義天地莫逃人之所惡有甚於死慷慨從容均足無忝述

忠節列傳第六十七

烏能反哺虎亦知義人之所異錫類之仁卷之方寸放乎四海述

孝義列傳第六十八

元書 卷百二十一  
昔者劉向是傳列女惟地配天三才之中彤管有煒傳之無窮述  
列女列傳第六十九

惟卜有數惟醫有理異哉釋老非復昞曇旁及工匠亦由妙悟元  
人重之亦入清流述藝術列傳第七十

卉有藝莽物有蛇虎毒人之雄生民畏之士夫戒之述權倖列傳  
第七十一

昔孔子作春秋亂賊用懼洪水起於細流燎原起於微燼欲善其  
終當備其始述亂臣列傳七十二

昔漢開西域斷匈奴右臂元人用師收爲羽翼述西域列傳第七  
十三

茫茫東瀛寅賓出日扶桑之區天所以實海孺述東夷列傳第七  
十四

神禹之功至於南海列島惟星古稱卉服而世祖開之述南蕃列  
傳第七十五

賊民之興天故生是以亡人國而亦無存荼毒生靈是則可哀述  
韓林兒徐壽輝張士誠方國珍列傳第七十六

惟元書十五本紀十志七十六列傳竊不自揆希附石室於是作  
自序第七十七

曾廉曰昔馬班秉筆記表志傳實史氏之權輿而皆自詳其家世  
出處歷官始末終以論次之意自是而後史之體例莫能外也惟  
太史公言自西伯孔子以來凡厥著述皆以困厄又言詩三百篇  
大抵皆聖賢發憤之所爲作此人皆意有所鬱結不得通其道也  
廉以爲文王孔子非夫人所敢擬議又不可以拘厄爲言若夫春  
秋史之所託始左氏爲其傳國語其外傳也文亦近之矣離騷說



難兵法呂覽則不得與史同稱也蓋太史公遭李陵之禍身毀不用以述往思來爲能發其鬱結故依託古人隱約之意罔羅天下放失舊聞原始察終見盛觀衰拾遺補藝傾吐其胸中之所言沛然達乎天地云爾非凡作史之通法也自晉以後史多官修非一家之言體多龐雜矣夫文可以已出而事不可以憑虛造是故史皆出於因而其所因者今多不傳故觀青而不知藍知冰而不知水事固然也自漢以來二千年間所知者漢書因太史公唐書因劉昫五代史記因癖居正南北史因十史而已其文有詳略其書有協背論者往往以攷異同尋論得失或謂創者難爲功因者易爲力要其所以致意之處未可以強齊也竊謂自漢以降惟潛溪元史第勤動作鈔胥而已其實未成書也何也太史公固言之矣春秋上明三王之道下辨人事之紀別嫌疑明是非定猶豫善善

惡惡賢賢賤不肖存亡國繼絕世起敝救廢王道之大者也後世之史固不敢言春秋然而不通於春秋之義則所謂君不君臣不臣父不父子不子者也此四者天下之大過也是故天順君也天秣臣也尊天秣而貶天順何也貶天順於是乎誣秦定秦定不可誣則遂以倒刺沙兀伯都刺爲姦臣而不知出於其國人及西域黨類之私也以倒刺沙兀伯都刺爲姦臣則自宜以燕鐵木兒伯顏爲佐命此所謂不能別嫌疑明是非不通於春秋之義者也於是征討爲反叛以謀亂爲起義以燕鐵木兒姦人之雄亂臣之首而盛稱其功績以馬札兒台稍存人臣之節而諱言其塗書斬使是故秦定一朝之將相及明宗從亡饋殮割股文武之倫皆所弗錄竝略開國之功臣而詳天秣之列校斯不亦顛倒之甚也哉然此在當時蓋有所忌以成爲此文而潛溪仍而不之改也是故

朔漠諸國無傳則不知國之所以開矣蒲鮮張李羣雄無傳則不知國之所以輯矣西域諸國無傳則不知國之所以拓矣韓徐羣賊無傳則不知國之所以亂矣若夫皇族無傳則不知三河源流分合之俗諸王無傳則不知藩國親疏向背之誼前不通先代之史則事有異議於前朝後不習當世之見聞則人有專美於異代其紀取諸實錄其表取諸大典其志取諸官書吏牘其傳取諸家傳碑銘其成之也速故其取之也狹其爲之也粹故碑將微勞得之卽編大臣元勳不得則佚且蒙古事蹟在元不肯宣傳其輿圖遼遠初明亦無從攷質此其所以不能會通而貫穿之也故曰未成書也是故闕而不完散而無紀尤而漏疏而膚繁而不知其要領簡而不得其門庭夫筆削可以徐而審是非不可以曲而淆文義可以錯而歧條理不可以紛而舛此固良史之法也自班氏以

來其致如此若夫以雄直之氣發鬱結之思此則太史公之事也人未有敢擬春秋亦未有能爲史記者也惟是我生以來夙抱柔之憤豐其屋葺其家闢其戶闐其無人大易所稱凶也憂心殷殷念我土宇舍爾介狄惟予胥忌天之降罔蝨賊內訌謂之何哉於斯之時風雅之詩人倘亦有鬱結於中者乎吾恐太史公猶未當乎此時也竊謂恩怨可不言而賢姦不可不辨成敗可不計而興亡不可不明誠哉棲息蠻山身禦魑魅未知死亡之日然慮荃蘭之爲茅不憂巫陽之夕降魂之不可招也昔李延壽言南北朝一則王道得喪朝市貿遷日失其真晦明安取二則至人高跡達士宏規因此無聞可爲傷歎三則敗俗巨蠹滔天桀惡書法不記孰爲獎勸竊謂猶不止此也元世異教盛行天子亦執弟子之禮昔者有周之季諸侯放恣處士橫議以楊墨之無父無君舉世汶

汝信而行之孔子之書之所不能懼孟子辭而闢之廓如也有唐  
之世佛老橫矣則有韓子興明先王之道以道之然後天下一軌  
於正夫楊墨有隱有著隱者猶足以害世況於其著張目以蔑君  
父者耶故曰能言距楊墨者聖人之徒也此則不揣固陋執簡以  
俟後世聖人君子者矣書既成擬因禮部表上表曰臣廉言臣竊  
撰元書百二卷繕寫已竟伏乞禮部恭代進

呈臣聞史遷之論通古今而究天人韓愈有言誅姦諛而發潛德  
有元葦孽朔漠奄有萬邦凡十有四君歷百六十載以漢法治中  
夏以本俗治國人風氣頗以野聞刻論者謂不得爲代遼金尙有  
史在一統者豈任其終湮惟明室之代興迫館臣以急就威稜懼  
乎雄主因襲類乎鈔胥數月而成史書終篇皆無論贊聖武開國  
名藩竟佚其勳猷天秣無君異代猶仍其忌諱大功延世而弗之

錄元惡彌天而無所懲況是非既不厭乎人心而尤漏亦頗乖乎  
史例斯則雄風不振已日宜占者也欽惟

皇帝陛下前鑑百王

近賓三恪

勤政則萬幾少暇

求書則四庫宏開臣伏處遐隄猥思載記寶書弗備黎獻無存敢  
舍舊以圖新爰芟繁而益簡雖私家之著述有慚永叔五代之編  
而

天祿之蒐羅願比遠平類編之獻臣無任惶恐屏營之至謹奉表  
隨進以

聞臣廉謹表

周敦豐  
刊  
曾驥騰

門人曾沂襄校

門人曾士琮詳校

跋

歷史無識跋自我爲之事有由也始我作元書亦謂當藏之名山傳之其人而門人士璋傳錯及晉促我出以行世適劉理卿中散首贈我以刊貲甚厚已而知我有所著樂助者踵至遂付剞劂二載而訖功嗚呼古人繕書以竹帛自宋以後多藉國家之力得以鏤板余窮而在下爲世窶人安能及此而愛我者惓惓不已豈非天下好文之風猶未墜乎中心藏之何日忘之爰仿漢魏碑陰之例列名卷末而三子者經營累歲綜理勞勩尤不可不錄也校刊既竟爲識于此用告後之人以比近古載籍記雕印始末云爾宣統三年八月廉跋



